

ASO LUA, 16 FEPUARI 2021

Na nofoia e le Fofoga Fetalai le Nofoa i le itula e 9:19 i le taeao.

Tatalo.

FOFOGA FETALAI: Ou te faasila sila atu ua toe amatalia Taualumaga ma Galuega a le Fono Aoao Faitulafono.

ISI FAASILASILAGA A LE FOFOGA FETALAI

FOFOGA FETALAI: Mo le silafia e le Palemene ua ou tau limaina nei le Teuteuga o le Poloaiga o Faalavelave Tutupu Faafuasei ua maea ona sainia e Lana Afioga Mamalu O Le Ao o le Malo.

Ma ou te tapa ma le faaaloalo le Susuga i le Failautusi o le Fono Aoao na te tolaulaunina nei Teuteuga.

Na fofogaina e le Failautusi le Teuteuga o le Poloaiga o Faalavelave Tutupu Faafuasei.

TEUTEUGA O POLOAIGA MO FAALAVELAVE TUTUPU FAAFUASEI MO LE KOVITI-19

E tusa ai ma le Mataupu 107 o le Faavae o le Malo Tutoatasi o Samoa, e tuuina atu ai Poloaiga mo Faalavelave Tutupu Faafuasei i Lana Fonotaga o le Aso Lulu, 10 Fepuari 2021 na talanoaina ai e le Kabeneta le Pepa PK (21/110) na faamaonia ai e faapea:

1. Faaauauina o le piriota mo faaaliga faasalalau o Faalavelave Tutupu Faafuasei mo le Koviti-19, mai le aso 15 o Fepuari seia aulia le aso 14 o Mati 2021.
2. Faaauauina o teuteuga o le Poloaiga mo Faalavelave Tutupu Faafuasei mo le Koviti-19 mai le aso 15 o Fepuari seia aulia le aso 14 o Mati 2021.

O le amata faamamaluina o le faaauauina o le piriota mo faaaliga faasalalau o faalavelave tutupu faafuasei ma ona teuteuga mai le aso 15 o Fepuari 2021

seia aulia le aso 14 o Mati 2021 ma toe iloilo ai e le Kapaneta. E faatumauina pea isi Poloaga o Faalavelave Tutupu Faafusei na muai tuuina atu.

O lenei faaiuga na faia i lona tulaga faanatinati e tusa ai ma le Vaega 38(1)(c) o le Faavae o le Malo Tutoatasi o Samoa ua faamaonia e Lana Afioga Mamalu O Le Ao o le Malo.

Sainia:

Tuimalealiifano Vaaletoa Sualauvi II
O LE AO O LE MALO.

**TULAFONO TAU FAAOFI O LE FAATATAUINA O TUPE
FAAOPOOPO (NU.1) 2020/2021 – felafolafoaiga faaauau
i luga o le faitauga faalua – Aso 20**

FOFOGA FETALAI: E tolopo Galuega a le Fono Aoao i le aso ananafi ua maea ona saunoa le sui usufono mamalu mai le itumalo faaalaalafaga o Faleata Sisifo.

Ma ua ou manatu o le avanoa lelei lenei e saunoa ai le Afioga i le Taitaifono o le Komiti o Tupe, le Susuga i le sui usufono mamalu mo Alataua Sisifo, le Afioga ia Aliimalemanu Alofa.

Ia ou te tapa ma le faaaloalo lau Afioga i le tamaitai sui usufono, o le Taitaifono...

Ia malie lau Afioga, se i tulai mai le Afioga i le Palemia.

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia): Lau Afioga i le Fofoga Fetalai, ua ou tulai atu ma le agaga faaloalo i lenei taeao fou e momoli atu le agaga o le faafetai i le taumafai mai pea o lau Afioga faapea foi le mamalu o le Maota nei i le faaauauina o tatou felafolafoaiga i le Tala Faatatau Faaopoopo o le Tupe. Ma ou te momoli atu le faamalo faapitoa ona o le tatou taumafai mai pea se i maea a tatou galuega. E le itiiti le taua o le faaauauina o le Fonotaga lenei e pei ona amata ai tatou Fono i le tolaulauina o Poloaga faatatau i le galuega tele o lo o feagai ma le Malo, le puipuiga o le soifua o tatou tagata. O lea lava tatou te matauina i le siisii pea i luga o le faitauaofai o i latou o aafia i le pipisi o le faamai, e ui o lea ua amata ona faagasolo tuiga i fafo atu, ae le

o taofia ai le tulaga o le vaavaaia pea e tatou Fomai, aemaise le Komiti o lo o gafa ma le faatinoina o latou tiute, o i latou ia o lima taumatau o le tatou Malo. E le mama le avega o lo o feagai ma le tatou Faigamalo i le taimi lenei.

O le mea moni, e le i faapea ua tupu le faamai i totonu o Samoa. O le faamai po o i latou o aafia, o tatou uso o lo o omai mai fafo. Ae pau lava le itu taua o lo o matauina pea ma le agaga faafetai, o le mataalia o tatou Fomai o lo o gafa ma le vaiaia ma le togafitia o siaki o i latou o lo o malaga mai fafo. E i ai le agaga alofa i le tagi mai ala o le mamalu o le tatou atunuu e fia foi mai i aiga, aemaise foi o le tapuaiga a Samoa i o tatou aiga o lo o aumai pea aumai pea talosaga, tatou aiga i Samoa nei, ua fia mafuta ma aiga aemaise fanau ua maua i le faamai a o lo o i fafo. O nei mea uma lau Afioga i le Fofoga Fetalai, e faafeagai ai pea le Komiti ma le Malo ma mea o fetuleiaiga malolosi. O fetuleiaiga malolosi e tulei atu i le itu o le alofa ia i latou i fafo ae tulei mai foi le isi itu o le alofa i o tatou tagata i Samoa nei. O le paleni o ia mea, e oooo i ai le faautautaga tatau i le taumafai e faapaleni le tulaga o le alofa mo i latou i fafo ma le alofa mo i tatou o lo o i Samoa nei. E matua tuutuu loloto lava i ai le atoaga o mafaufauga, e le gata i le Komiti ma le latou fautuaga e aumai i le Kapaneta, a o le fesufiaiga o le tofamamao i totonu lava o le Kapaneta.

Lau Afioga i le Fofoga Fetalai, o le itu taua o nei mea uma, o le lipoti mai i inei i le Palemene, ina ia silafia ai e le tatou Maota le taua o galuega o lo o fai nei. Le silafia lea e le o mafai ona maua e i latou ua latou le faatauaina le Fonotaga a le Palemene, ona o lea e faagasolo pea a tatou felafolafoaiga ma faaaliga o taofi. O le itu lea ou te tulai atu ai ina ia faataua i le faafogafoga mai a Samoa le vaega faaiu lea o le galuega o lo o faatino e le aufaigaluega a le Malo, o lo o faatino e le Kapaneta, ae faaiu mai i inei i le Palemene, faaiu mai i inei i le Palemene. Ia fofoga le Palemene o Samoa, faafogafoga foi le matau mai a le atunuu i le faasologa o galuega a le tatou Malo. E amata mai lalo faasolosolo mai ai ia te au ma le Kapaneta, ona faasolosolo mai ai lea i totonu o le tatou Palemene nei, ina ia silafia e lau Afioga ma le mamalu o sui o nuu uma o Samoa, ae a le faafogafoga mamao mai o i latou e le o mafai ona paau mai i a tatou Fonotaga i le taualumaga o le Fono mamalu, le Fono paia le Fonotoa a sui usufono o le atunuu o lo o faagasolo nei.

Lau Afioga i le Fofoga Fetalai, o le itu taua lena, e faaiu uma mai lava mea uma i inei i le mea o lo o i ai sui o le atunuu atoa, ina ia aua ne i faapea ua pitotasi le faatinoina o tonu na o se vaega o le Malo, e faaiu mai lava i inei i le Palemene ma lau Afioga. E momoli ai le faafetai i le mataalia o le aufaigaluega a le Malo, latou ia o lo o ave i ai le faalagolago, a o lea foi ua outou faafogafoga atu i le faasau o le lipoti i le tama lea na o mai ma le tina, o lea lava la o lo o mataituna ma o lo o faia uma galuega a alii Fomai ina ia aua lava ne i i ai se vaega e le mafai ona tilotilo i ai, ma e ono toe fetuunai ai faaiuga foi a le tatou Malo. A alu atu foi la taeao po o talaatu taeao ua

faapafala uma faigamalaga ia na fuafua, a ua malamalama le atunu i le talanoa atu i lenei taeao, ona o le paleni ia o mea e le mafai ona aveesea ai le mafaufau.

O le ala lena o lea e faaletonu ai nei le lalolagi i le taimi lenei i le tulaga ua oo i ai le afaina o le lalolagi, ua lē paleni le lalolagi i le tulaga o le siosiomaga, ua televave tele faaiuga fai a le tagata soifua ua le ogatasi ma le finagalo o le Atua na Ia fausia ai le lalolagi, e paleni mea uma ina ia tatou ola fiafia ai ma tatou fanau.

Lau Afioga i le Fofoga Fetalai, o le soso atu lena i lenei taeao, a o lea o le a agai le tamaitai Taitaifono o le Komiti o Tupe, o le toe lauga lea, ona faasolo loa lea o le tali atu a le Kapaneta e tusa o mataupu na laga, aemaise foi le ooooga ma le loloto o le galuega o lo o faatino e lea Minisita ma lea Minisita.

Lau Afioga i le Fofoga Fetalai, ia manuia le tatou Fono.

FOFOGA FETALAI: Malo faafetai. Ua faafogaga le Palemene faapea foi se faafogaga tapuai mai a Samoa i le saunoaga manino a le Afioga i le Taitai o le Malo e faasilasila ai ma faalauiroa i le Palemene aemaise o le atunu i le taua o le Fonotaga a le Palemene o faagasolo nei, i le tulaga o fuafuaga alualumamao ma le puipuiga o le atunu e ala i Fonotaga a le Kapaneta i ana faaiuga fai, ina ia malupuipuia Samoa, ina ia malupuipuia. Aua e fai foi o le alolofa i alo ma fanau ma aiga o lo o tagi mai ala lo latou fia malaga mai, ae fai silasila foi e le Malo i le paia ma le mamalu o le atunu ne i aafia i tatou i le tulaga o le faamai oti e pei ona i ai. Ae malo faafetai. Ona o le Palemene lava ia e alu atu ai tonu mautu ma mea moni, e faapena ona faafogaga mai i ai Samoa. O le mea lea e le mafai ai ona nooia ma taoto i paga le tulaga o se finagalo o le Malo e ala i le saunoaga a le Afioga i le Palemia e ao ona faalauiroa ma faasilasila i le faafogaga mai o le paia o le atunu. Ia, malo faafetai fai o le faiva e pei lava o le upu e fai i Atua.

Ia, ae o le a oo atu le tatou faasologa i le saunoaga a le Afioga i le Tamaitai Taitaifono o le Komiti o Tupe, o le sui usufono mai Alataua Sisifo, lau Afioga Aliimalemanu. Manuia le saunoaga.

Afioga ALIIMALEMANU ALOFA TUUAU (Alataua Sisifo): Faafetai mo le avanoa. Ia, tatou te auai faatasi i le viiga o le Atua ua maea ona molia, ona ua tatou toe feiloi i lenei taeao fou i le manuia.

Lau Afioga i le Fofoga Fetalai o le Maota ma sui usufono mamalu o lenei Maota, o Samoa ua faatasi mai faapea foi Samoa o lo o faafogoga tapuai mai. Ou te tulai atu ma le ava tele mo le saunoaga mulimuli a le itumalo o Alataua Sisifo i le Paeaiga Lona XVI lenei o le Palemene. Ona laei lea ma tau faagape aua o le papa aegata le Maota o Samoa. O le Maota o Samoa e ana le filiga, aemaise le faafogaga tapuai mai a Samoa o e ana le filiga ua tatou tiu faamatalaoa ai nei i upufai o Malo i lenei Maota ma lenei Palemene.

Ae ua ou taofi, o sa e le avea ma faiga e tumau o lenei Maota, faapea paia faaifogata ma mamalu faaofogata o Samoa i ona tulaga faalupe, ua taoto a alai'a i saunoaga a sui usufono mamalu na asa le ataata o lenei Fonotaga. E tainane se faatauvaa pe oo i ai pe apaapa foi i ai se tala, e le lilo pe lanu i se taumamanu. Ae o paia foi ma mamalu e tumau, ua taoto tanu tuaoi o le va vavae ma le va tausi i le faautaga a le au ponao, e mafua ai le taofi, taoto ia le laau mamafa, aua o le laau foi ua maea ta tulaga, e le malu pe toe siia foi se paia po o se mamalu i se tala a lou nei faatauvaa.

Ia, le paia e o le tapuaiga a si ou itumalo pele o Alataua Sisifo, ia tapuai maia ma le manuia se i taumafai se tatou tala mulimuli mo lenei Paeaiga a le Palemene. O lele ua lutiluti a iu malaga le folauga, aua e manuia faiva sii e tapuaia.

Lau Afioga i le Fofoga Fatalai, na o le 3 lava manaoga o le Alataua Sisifo na ou faaleo i lenei Maota i lenei Paeaiga, ona sa ou malamalama lelei lava i le tau faasoasoaina o tupe ina ia laugatasia uma itumalo e 49. O nisi o manaoga e patino i nuu taitasi, sa fesootai atu ma tau tulituliloa i ofisa o Afioga i Minisita ae faapea foi Ofisa Sili o Matagaluega ma Faalapotopotoga. Ma ou te tolaulauina nisi o galuega na ausia ma faatino ma faamanuiaina talosaga ma taumafaiga e pei ona molimauina.

Lau Afioga i le Minisita mo Fesootaiga ma Faamatalaga Faa-Tekonolosi faapea lau Afioga i le Minisita Lagolago ma le aufaigaluega, o la le ua faasopolia uma le itumalo atoa i le auaunaga a le TV faapea foi le Leitio, aua sa matua le mafai lava ona maua mai e si o matou itumalo mea o tutupu i Apia nei, tainane le atunu ma le lalolagi, aemaise lava taualumaga o Fonotaga a le Palemene. Ou te iloa o la e maimoa ma faafogata tapuai mai po o le a se tala o le a mafai ona fai e le latou sui usufono. O se tasi lena o manaoga sa faaleo i lenei Maota.

Lau Afioga i le Minisita o Galuega ma le aufaigaluega a le Pulega o Felauaiga i le Laueleele, la le ua fai ma auala e ui ai e malaga atu agai i Tufutafoe ma agai atu i Falelima, le auala na toe fausia atoa agai i Neiafutai lea sa faaaluina ai le \$1.2 miliona. Ua inu malie foi Neiafu i galuega a le Pulega o le Suavai ina ua faasopolia uma le afioaga i le suavai paipa, ia faapea foi ona fai moli auala mo Tufutafoe e le aufaigaluega a le EPC lau Afioga i le Minisita o Galuega.

Lau Afioga i le Minisita ma le aufaigaluega o Pisinisi, Alamanua ma Leipa, se ua lasi le vaai i le atiaeina o aiga ma nuu e ala i fare fou faaonaponei, o taavale, o pisinisi, ia ma atinae a aiga lava ia ona o avanoa faigaluega e 35 na faamatuu atu mo Neiafu ma Tufutafoe. E i ai foi ma avanoa faigaluega faa-seila i atunu i fafo. Lau Afioga i le Minisita ma le aufaigaluega a le Faalapotopotoga o Vaa, le Samoa Shipping Services, ua fai foi ma sao o ia tama fanau le atiaeina o le itumalo ma le atunu.

Lau Afioga i le Minisita o Faatoaga ma Faigafaiva ma le aufaigaluega, ua iloa ma ua i ai so matou sao i le atinaeina o le tamaoaiga ona o avanoa ma

fesoasoani e ala i maketi i fafo mo le ava, aemaise fesoasoani e ala atu i le polokalame o le Samoa Agribusiness Programme, ona o le malosiaga lea o le matou itumalo i le itu tau faatoaga, o le totoina o le ava, aemaise lava i Neiafu. Ae ua faapena foi se vaaiga i le alualu i luma o le atiaeina o faatoaga ona o le uunai malosi ma le fesoasoani a le Matagaluega.

Lau Afioga i le Minisita mo Tina ma Tamaitai, Atinae o Afioaga ma Agafesootai ma le aufaigaluega, o le filifilia o Alataua Sisifo e amatamea pe palota ai le polokalame lea o le tapenaina o taiala o atinae mo itumalo, e le i mama i le itumalo lea faaeaea, ona o lea ua tele le tomai o tina i poloketi ma polokalame o suisui faapea laau suisui mo tina o le itumalo. Ia, e faapea foi poloketi o togalaauaina mo le itumalo atoa, o nisi lava o atinae sa filifilia lava e latou e ave i ai le latou faamuamua i taiala mo atinae o itumalo.

Lau Afioga i le Minisita mo Punaoa Faalenatura ma le Siosiomaga ma le aufaigaluega, ua le gata ina toe tapue ma faaleleia oa faalenatura e i ai vaitaele ma vaituloto i Neiafu, ae ua avea nei ma se tasi o mataaga mo lea itu o Savaii. O lo o faagasolo foi galuega a le Pulega o Tagata Tafafao Maimoa mai Fafo mo le faia o fale talafeagai po o garden toilets mo lea mataaga.

Lau Afioga i le Tamaitai Minisita mo le Soifua Maloloina ma le aufaigaluega, ua le toe feoai mai lo matou itumalo faapea le Itu Asau atoa agai i Tuasivi e tala atu ai latou vai. O la ua maua talavai ma fualaau i lo matou falemai faaitumalo i Sataua, ae le gata foi i lea, o lea sa faaleo e le tele o sui usufono, ma o le lagona foi lea ina ua i ai le fomai mo le matou falemai faaitumalo.

Lau Afioga i le Fofoga Fetalai, e i ai foi ma nisi galuega o lo o faagasolo i le taimi lenei, ma ou te fia tolaulauina foi. O le auala galue a Falelima, o lo o faagasolo nei e le Pulega o Felauaiga i le Laueelele le filifilia o se konekarate mai tauofoga sa faasalalauina e na te faatinoina lea galuega po o Mati. Ma o se tasi lea o vaega o le isi manaoga sa faaleo i lenei Maota. O le faamuamua a lenei itumalo i manaoga sa faaleo, o le kolisi lea mo le Itu Asau Nu.2, lea na pasiaina e le Kabeneta i le 2017 le faaigoaina o lea kolisi o le Kolisi o le Alataua Sisifo, ma e aofia ai lo matou itumalo, le itumalo o Falealupo, ma se vaega o le itumalo o Vaisigano Nu.2. Ma e faatuina lea Kolisi i Neiafu. O lea ua faamatuu mai le fesoasoani i le Tala Faatatau Faaopoopo o le Tupe lea 2020/2021. Ou te iloa e aafia ai ma Vaigaga ma se isi foi faleaoga, e amata ai lea galuega tele, mo le suaina ma le faalaugatasia o le fanua mo malae taalo. Ma o lo o galulue faatasi ai le Matagaluega o Tupe ma le Matagaluega o Aoga i le faagasologa o lea galuega e tusa ma faiga faavae.

O lona 3 o galuega faagasolo, ua faagasolo foi fuafuaga a le Pulega o le Suavai mo le faaooina atu o le suavai a o le i uma lenei tausaga mo aiga e 12 o Tufutafoe e le i oo i ai le suavai paipa.

O galuega faatulaga. Lau Afioga i le Fofoga Fatalai, o nisi nei o atinae ua faapea ona agai i ai se manatu e tulituliloa pe afai e tofa le matou itumalo...

FOFOGA FETALAI: Ia, malie le Taitaifono se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fatalai, e faamalulu atu i le sui usufono ona o le kolisi lea sa ia taua, ua o se fuafuaga ua loa foi ona finau mai ai le sui usufono. Ae sa i ai nai faafitauli sa feagai ma le Malo, le Ministry of Education i le naunau mai o le sui usufono ma itumalo uma ia, ae o uiga ia o fuafuaga a le tatou Malo, e tatau ona lava faiaoga e latou te aoaoina fanau o le a aooga i i ia maualuga le aoaoina. O lona uiga, ia lava faiaoga.

E le tauiso lea tulaga ona e pei ona silafia i le Nofoaiga talu ai, na mapuna ae ai le faafitauli tele lava, e le gata la o Samoa, ae na aafia uma ai le Pasefika, o le sioki lea po o le lava o faiaoga i le mataupu lea o le Science, e aofia ai la ma Mathematics. Ua ou te i ina ua faamatala mai e le Minisita i le taimi lea, o mea ia ua fail ai plannings sa fai i tua atu. Manatua foi o mea nei sa tatau ona vaai i ai isi Minisita na muamua atu ma isi CEOs na muamua atu, o le tulaga lea ia lava le fuafuaga mamao agai i luma o faiaoga, ina ia mafai ona faatofutofusia aoga uma i kolisi uma ia i tua. E pei ou te taumate atu pei o le a saunoa i ai le Afioga i le Minisita, pe tusa ai ma le 40 kolisi ma aoga maualuluga e matua manaomia ai lava faiaoga ia, faiaoga ia i mataupu tau Science ua lava aoaoina ina ia popoto fanau a Samoa. O lea faatoa ou te i ai i le mea lea i le taimi lea. O tamaiti uma na pasi, e i ai le faiga ua nonofo latou pulega o aoga ma toe tuu i luga o latou togi, ua toe tuu i luga o latou togi i se faiga e faamanai a togi. E le na o Samoa la na aafia ai, na aafia uma ai lava le Pasefika, ona o mataupu ia e fonoa loa Minisita o le Pasefika, ona sau lea o lea ma lea manatu, sau lea ma lea manatu, e atagia ai o mataupu ia e vaivai ai fanau uma a le Pasefika. O lea la sa latou nonofo ai ma fai le faiga lena e tuu ai foi lea i luga artificially ia maka e toe remark agai i luga. A avatu la le tamaitiiti sa 70% lana Mathematics po o le Physic, ae ua remark i luga i le 90, piki mai loa i o i tatou sikolasipi ia e ave. Ae o atu fail mai ai i o, ona o le tulaga faaletonu lea.

Sa ou tusi ai i le Iunivesite ma le Ofisa o Aoga, o le a le fofo e fofo ai le mea lea? Ua matua leva ona outou nofonofo, ae o lea e tu mai faafitauli ia. Ia fai mai se fofo o mea ia, o outou lea e lafo atu i ai le avega, o la outou responsibility, o lo outou tiute lea, ia faatulaga lelei faiaoga, ia lava faiaoga. Ae aumai ai loa e le Minisita ia Magele, ma le foi sa avea ma Ofisa Sili le fofo. O le fofo o le matua taugata, e fili mai le 60 o faiaoga Science, e aumai e ave e toe fai le latou aoga faapitoa mo faailoga e faia i Alafua. Ina ua faalauiloa e Samoa le mea lea, faatoa iloa uma ai loa e isi foi Malo o le Pasefika le mea lea e tupu. O se faaiuga na fai e Minisita o Aoga o le

Pasefika, e le o se fofo, e na o le atili ai ona faaletonu fanau a le Pasefika. O lea la na ala ai loa ona taufifili. O le a la le fofo? Ae fai atu le Iunivesite o le Pasefika, ia outou o e fai le fofo lea ua fai e Samoa. O le fili mai o ni a outou faiaoga Science ae totogi e le Malo le toe fai o le latou aoaoga e siitia ai le latou aoaoina. O lea la na graduate uma ai le 60 lea, ia toe aumai le isi 60 toe faaalu, o le auala lena na fai e tatou lea na mulimulitai mai ai isi Malo o le Pasefika, but we took the leadership.

Lau Afioga i le Fofoga Fetalai, o le tulaga la lena, o lea sa mafua ai ona tau faatuatuai le talosaga na aumai. O itu ia e le o malamalama i ai matua i tua, o lea foi e oo lava i le Kolisi lea i Lepa, o lea foi e tagitagi mai i ni faiaoga e maualuga lo latou aoaoina. O le tulaga foi lea o lea ou te talatalanoa ai i le Minisita ma le Ofisa Sili o lo o i ai nei. Ia fetuutuunai a latou faiga faavae, vaai le vaega lea e litaea, afai e le o lava, toe aumai e faafiaoga.

Lau Afioga i le Fofoga Fetalai, o le itu lena, ina ia manino lelei ia le mataupu lenei, ne i te i ua tuuaia le sui o le itumalo. A o lea ua ou tau atua le faafitauli sa i ai, na mafua ai ona faatuatuai ia le iuga lea. Ou te manatu, o lea ua taoto i lautuatonu, ia le mataupu lea. Ae o le aoga o le aumai e le sui, o lea ua ou faamalamalamaina atu ai, ia le toa sa i ai. Ma talosia ia faaauau pea e le Matagaluega o Aoga, i le Tamaitai Pule o i ai ma le Minisita, ia aua ne i toe solo i tua le tapenaina o faiaoga. Ia lava aoaoina, ia matua popoto fanau a Samoa.

Lau Afioga i le Fofoga Fetalai, o le faamatalaga lena ina ia manino ai le mataupu lea.

FOFOGA FETALAI: Ia malo, faafetai. Tapa lau Afioga i le tamaitai sui usufono o le Taitafono o le Komiti o Tupe. O lea ua maua le faamaninoga e le Palemia o itu na telegese ai le faataunuina ma le faasoa.

Afioga ALIIMALEMANU ALOFA TUUAU: Ia faafetai i le Palemia mo le faamalamalamaina o le mataupu a lenei itumalo. Lau Afioga i le Fofoga Fetalai, ona ou oo mai lea i galuega faatulaga. O nisi o nei atinae ua faapea ona agai i ai se manatu e tulituliloa, pe afai e tofa lo matou itumalo ou te toe foi mai. O le tulaga muamua o le auala mo Tufutafoe, ua uma ona i ai saililiga a inisinia. Ma e tatau ona toe sua ma fai atoa lea auala agai atu i Falealupo. O lona lua, o le faaleleia o le aualagalue mo Neiafu, ona o le toatele o le aufaifaatoaga ava. Ma o le nuu foi lea o lea e numera tasi i le totoina o le ava. E ao lava ona faaleleia le aualagalue. Ma lona tolu, o nisi o mataaga ma tala o le vavau, o lo o i totonu o le itumalo o Alataua i Sisifo. E fia atiae faasolosolo aua se sao i le tamaoaiga o le atunu. E le i fausiaina Roma i se aso se tasi. A o le vaai mamao, a oo ina fausia le uafu lea i Asau, ma tele pisinisi e faatuina i le la itu o le motu. E manuia ai tupulaga, e le gata i lo matou itumalo, a o le itumalo atoa o le Itu Asau, e faapea foi i nuu e tau lalata ane e i ai Aopo ma Letui. E faamanuia uma lava i nei atinae.

Lau Afioga i le Taitai o le Malo ma le Kabeneta, o outou lava o auauna a le atunu, vaeatu outou paia ma mamalu. O laau na filitofi e faatino le finagalo o Samoa, o le talitonuga aua ne i o tatou faoa le viiga o le Atua. Ma ou te manatu, e le o so outou finagalo foi lea, o le toe faavivii ma faafetai atu. Aua o upu lava o le Tusi e pei ona faalogoina soo i lenei Maota. A maea ona tatou faia o se galuega, ona faapea ane lea o auauna le aoga i tatou. Ae ui lava i lea, lau Afioga i le Fofoga Fatalai ma lenei Maota, ua ou tolaulauina galuega ausia mo lou itumalo. E le o se isi tulaga, ae taua le faailoa atu o le tali atu a le Malo ma a tatou paaga, i manaoga o si ou itumalo. Aua o le loto faafetai foi lea, e le tele ni tupe a si o tatou Malo, ae tau faasoa lava. Ina ia oo uma auaunaga manaomia, i so o se tafa o si o tatou atunu. O le tofa mamao fuafua lelei lea, o lo o i o tatou taitai, mo le manuia lautele o o tatou tagata. Ua ou tolaulauina foi galuega faagaso ina ia silafia ai, o nisi taumafaiga ua le ausia e lenei Paeaiga, o le a faaaau atu i lena Paeaiga. E tainane ai, po o fea e taoto ai le tofa a le itumalo, e faaaau lava. O le galue punouai, e le fuatia i se taui, ae auga ma faamoemoe ia manuia le itumalo ma le atunu. O le fesootaiga lea ma le vaega tolu i galuega faatulaga na ou tolaulauina. O taulaiga o manatu ma le vaai mamao, ma moe manatunatu mo le atinae ma le manuia o le itumalo ma le atunu. Pe a finagalo Alataua i Sisifo ou te toe momoli maia le latou tofa i lena Paeaiga.

Lau Afioga i le Fofoga Fatalai, se i fai sina tala puupuu i se vaaiga aoaotetele i le tamaoaiga.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: E tatau ona ou tulai atu o se mea e fia faamalamalama. O lea sa saunoa le sui usufono, e faatatau i le uafu ma le taulaga i Asau. Ma e le o ni upu e avane ai, o le ki atoa lea ma le tatala, o le atinaeina o le Itu Asau atoa ma le la itu o le motu. Lau Afioga i le Fofoga Fatalai, ina ua o mai le kamupani tele mai Amerika o le Pokalaki, sa feoai i totonu o le atunu ma latou matauina. Ia se auala e mafai ai ona lau ese atu le laau le laupapa, o lo o maua i Samoa nei. Ma o laau ia e faaigoa o iron wood, o ituaiga laau taugata tele laau ia. E manaomia e le tele o atunu o le lalolagi ona e le magaugau gofie, e malosi, e umi ona faaaoga. E i ai laau faapena e maua i Amerika, masalo o ituaiga laau na e le aina e le age, e faigata tele.

O le ala lena sa o mai ai papalagi ma taamilo i le Pasefika ona latou iloa ai lea o le laau lena o le ifilele, e ola tele i ina. Ona o mai loa lea e vaai se auala, e mafai ai ona latou ave le laau lea i fafo, soona ta. E pau lava le mea sa agaga i ai tatou i lena taimi, o le tupe ia maua. Ae sa tatou le vaai tele i le tele o le tupe e maua mai. Ae pe a na taofi le laau e ili i inei, ma lau ai i fafo laau ua uma ona ili, ae ua ave ogalaau. Lau Afioga, e laititi le tupe na o tatou maua, ae o le tele o le tupe na ave i fafo, o la ua tau leai ai ni ifilele o toe maua. Ae vagana o le mamao i uta, ma o le ifilele foi la lea, e tatau ona

puipui malu i ai ia so o se afioaga. Ona e tatau ona i ai ni ituaiga company, e mafai ona latou gaosia ai, na o meafale taugata e maua ai. Ae le tatau ona faaaaoga i le fausia o fale, e le maua atoatoa ai le seleni mai laau nei, i le soona ta ta ma lau mai, fau ai fale. A o le tulaga e tatau ona i ai, o le matua fau lelei ai o mea laiti, e tele le tupe e maua mai ai i meafale laiti ma lau i fafo. O le naunau la o papalagi na, e ta ia vave laau lea ma avatu i fafo. O lea na o mai ai loa, fai loa le latou talosaga, lea na soona ta ai le ifilele mai le Itu Asau, agai atu ai loa i le la itu o le motu. O le mea la na fai e le Malo, ona o i i Asau, e leai se natural channel, e le se ava. E manatua foi o mea nei o le ava, e ava ai le soloatoa o le amu ma le papa, mai le isi itu o le aau i le isi itu o le aau, e ava, e va. Ae mafua ona va, ona o le tafe atu o le vaitafe, ma agai atu i ai. E le ola ai manu ninii ia latou te fausia ia le papa sosolo o tu ma amu lea e maua ai ia mea nei o aau, o aau sosolo. Ae ava la le mea e alu atu ai le vai malulu ma le vai e magalo, e le mafai ona ola ai manu ninii ia latou te fausia ia aau sosolo.

O le ala lena o lea na taumafai ai le Malo, e tui i fanaia ia fau se ava. Na maua le ava ae na o vaa laiti e mafai ona ofi atu ai, lea na mafai ona lau ese mai ia le ifilele. I le taimi na tuputupu ae ai pisinisi, na fau ai ma fale, tele fale, toatele tagata faigaluega. Na tutu ai fale tetele sa i ai ma tagata faigaluega. Na matua mauoloa ai lena itu o Savaii. Na fau ai ma le malae vaalele, ua eli mai le oneone ma le papa, ona aumai lea ua fola i tai, maua ai ma le malae vaalele i ina, na fau ai, sa felelei atu ai a tatou vaalele i inei ma tu ai i ina, i tai e alu ane i luga o le aau. Na fau ai ma le pamaa i le itu i tai, a sau le auma, tali ai i ina. O lea la na mafai ai ona faaauau ai pea le galuega lea i Savaii. Na o mai foi la i inei i Upolu isi ma taamilo, i le tatou atunu, ma aumai ai la latou talosaga, e fia toto le suka. O le matua pepelo lava o na mea, ae tatau ona ta muamua le laau. E faatoa maua atu e lo tatou Malo, e le o se totolina o le suka, a o le taina o le laau e ave. O lea na taofi e le Malo i le tausaga e 1988. Na amata mai i le taimi lena, ona faataoto loa le tatou Tulafono, ma avea ai loa le tatou atunu, o se atunu ua faataua le siosiomaga. Na taofi le toe soona ta o laau ma ave i fafo.

O lea foi la ua tulai mai le taimi lenei ma ua aafia le lalolagi atoa. E tatau ona toe asiiasi le Malo, pe tatau ona faaauau pea le soona ta o laau, i le taimi lenei. E tatau ona toe asiiasi i ai le Malo mo le puipuiga o le tatou siosiomaga mo le agai atu i luma. Ma ua silafia suiga o le tau lea ua i ai nei, ua oo lava i vaitafe, ua amata ona pepe vaitafe. Ua oo foi i le mago, lea ua i ai le mago o le laueleele, i le vevela o le tau. O laau sa le mu gofie, ua mu ua pei ni aulama. O lea na mafua ai le afi tele lea, toeitiiti 3 masina pe 6 o mu le togavao i le tausaga e 1983. Ua fiu le mea e tau titina, o le faatoa mu lena o se vaomatua i Samoa nei. Lau Afioaga i le Fofoga Fetalai, o le 1983. E tatou te le iloa, o lea ua amata ona aafia tatou, afia le tatou siosiomaga i le malosi o le vevela. O lea la e alu nei, ia le vevela, lea tatou te vaai atu i TV, e matautia timuga ia ua tutupu i atunu i fafo ua aafia ai foi tatou. O i i atunu

laiti ia, ua alu ae le sami i mea sa masani ona toto ai talo i le laugatasi, aemaise o atunu e i ai Tuvalu ma Kiripati. E le o ni ata la mea ia tatou te talanoa ai, o le matua aafia o le tatou atunu, e manaomia ai le vaai mamao.

O le vaai mamao lea e sausaunoa i ai le sui, e matua manaomia lava le vaai mamao. O le ala foi lena o lea e aumai i totonu o le Tusi Paia, i Afioga a le Atua. E matua manaomia lava e le Atua ia taitaiga o atunu o Malo, ia vaai mamao, mamao le vaai mo le puipuiga, o le siosiomaga na faia e le Atua, ina ia tatou ola fiafia ai. Lau Afioga i le Fofoga Fetalai, o le itu la lea e taua, tatou liliu loa lea e tui le ava lea, tui tui ua le mafai ona tui, ua gapa. Ona tatou amia loa lea, sa ou taua muamua le mea lea, a o lea la ua tatou oo tonu lava i ai, e tatau ona toe faamalamalama atili. I le taimi lea, o lea ua tulai mai ia Tupuola Efi, o le Minisita o Galuega, a o le taimi tonu lea sa ou i ai foi i le Ofisa o Galuega e tupu ai le mea lea. I le taimi puupuu lava na tofia ai au, ou te tauaveina galuega e lua. O le Investigating Officer i le Treasury, toe Acting Director i le Matagaluega o Galuega, ou te take over ina ia galuega sa tauave e le Deputy Director o Jetwood i le taimi lena sa ou i ai i ni na i masina. A o lea la na ou au tilotilo ai lea i le faatinoga o le uafu lea i Asau ma le taumafaiga ia faaloloto. Na aumai ai ia inisia a le Malo Aufaatasi e aumai mai o i Holland, lea sa ou faamatalaina atu muamua.

Ae o lea la ua oo tonu lava i le taimi, e toe faamalamalama atili. Ona o mai lea maulu i lalo, test ia le papa sosolo. Na fai mai le lipoti, e uma uma fanaia i ai e le mafai ona taei ia papa sosolo lea. Ua le toe aoga ni fanaia, o le taimi lena o le tele o fanaia na aumai, ma liki atu i tua ma tafana ai ma auia e le toatele o tagata i na ona aso. O le itu la taua, ua alu alu lava, ona fai ifo lea i lalo ina ua agi mai le Ofa. Na agi mai lava le Ofa, o mea uma lava sa eli mai totonu i i, lea ua toe alu uma lava i i i le ava. Ua soloia ese ma le malae vaalele, ua le toe i ai se malae vaalele, asu uma ese ma taligalu e Ofa. O la ua leai se malae vaalele o i ai. Ona toe fai ai lea o le isi malae vaalele, e faaaoga ai i taimi nei i mea o emergencies. Lau Afioga i le Fofoga Fetalai, o i ina na fai ai loa foi ma le iuga a le Malo, ia tapuni ia na mea ua le tatau ona toe faaaauau. Ae taatia e i ai se aso, ona toe tilotilo loa lea i ai. O lea na tapuni ai loa lea o le ili sa i Asau, o le a le mea na tupu lau Afioga? Na tapuni i le 1984, ona taatia mai ai lea o fale la e pei se coast town. Ua tatiai uma, ua leai ni galuega ma ua tapuni atoa loa ma le ili a le Malo na i ai. Ua leai se aoga, ae sa mafai lava ona faaaoga nai vaa laiti.

O le tulaga la i totonu o le taulaga lea i Asau, e pau lava lea o le taulaga tele lea e i ai, po o Samoa atoa, e le tau faalolotoa i le mea e feliuai ai ia vaa. O la lava e i ai le uafu tuai lea sa fai. O le mea e manaomia, na ona taei lava o papa ia, ona toe tatala loa lea o le ava. Ua uma la ona faatalanoa ma fafo, ia se tasi foi o Malo ma latou kamupani. O le tala a le isi kamupani, a o mai e fai le mea le la, e le umi lava ona latou faia. Latou te le faaaogaina nei mea o fanaia, mo mea tuai lava na. Ae o la e i ai latou masini, na ona alu atu lava o le masina, aati, aati, aati, mea uma ia, talepe atoa ma faaatele le ava. E

masalo e le atoa le 6 masina latou te faia ai. Ona taatia mai loa lea o le ava tele i ina, e mafai ai loa ona ofi atu vaafagota aemaise o meli tetele. Ona toe ola ai lea o le itu atoa lena le Itu Asau. O lea la e tele faatoaga a le Malo o la sa fai ai i ina. O la e oo mai nei, o la e ola tetele laau, o laau toto o laau fua o la e i ai. Ma o lea foi ua toe gaoioi le Matagaluega o Faatoaga e toe faalelei atoa ia le faatoaga a le Malo i i, i uta i le Itu Asau.

Lau Afioga i le Fofoga Fetalai, o lou popolega, o le toatele o tagata ia taufaifai i o i le fausia o le uafu lena, e o faatasi lava ma le uafu lea e i i Vaiusu. E o faatasi, ae o Asau, e laititi lava, e na ona o atu lava pigi pigi, ia uma. A o le tele o le taimi o Vaiusu. Lau Afioga i le Fofoga Fetalai, o fuafuaga mamaao ia a le tatou Malo. E le o se faata le mea lea e fai, o le mea ua uma ona faatalanoaina e le Kapaneta. O le tasi lea o auala, e fau loa e le Malo ma atiae se atunu, e i ai le upu faa-Peretania, decentralization. O le a le uiga o lea mea? E i ai vaega o le atunu e autu i ai, o le laumua e pei o Apia, ae decentralize loa activities i tua. E agai i tua le Malo e atinae uma vaega tetele ia. E pei la o o i Asau, o i i Salelologa lea e fau ai le aai tele, le taulaga. Ona o Salelologa o le faitotoa lea o le ulufafo ma le ulufale, e tulata mai i Apia. E faapea le faiga o mea o le natura, e fesootai motu i vaega e aupito sili ona vavalalata e taugofie ai.

I le agai atu i le lumanai lau Afioga i le Fofoga Fetalai, e tele le fefaatauaiga i le va o Samoa na lua, a o fea le mea e aupito lata? E faigofie taugofie femalagaaiga a Aleipata ma Tutuila. Na ou talanoa i Kovana uma lava ia, a mafai ona faatu se tou uafu i i pito mai i Leone, ona tipi atoa ai lea o le malaga a le vaa, i le itula atoa. E alu atu ai toe taamilo i le motu ona alu ai lea i o i Pagopago. Ae a tu mai le uafu i i Leone, e feagai tonu lava ma Aleipata, e ono tipi le malaga lena, i vaa saoasaoa, e 1 ma le 1/2 itula, le alu atu i Aleipata i le agai i Leone. Na ma toe talanoa ai foi ma le Kovana o lo o i ai nei. Ma ua oo lava i asiasiga a sui o Amerika e o mai i inei, o lau talanoa lena i ai. E fesoasoani i le Malo o Amerika Samoa, fau se uafu i i i Leone e taula ai le vaa atu i inei, e faafaigofie ai fefaatauaiga. O lo o tele ia mea tau faatoaga i Samoa nei, ae faalelava eleele i Tutuila. O mea ia e felagolagomai ai Malo e lua mo le agai atu i le lumanai.

Lau Afioga i le Fofoga Fetalai, foi mai i Asau, e faapena le faiga o fuafuaga mamaao, a fuafua, e fuafua i le tofa mamaao. O fea e sau ai le tofa mamaao? E sau mai le Atua, agai ane i o, toe tapa ma latou ua aoaoina faapitoa. O i latou o tatou professions, o inisinia. O le mea lea e ala ai ona faataua inisinia, a tatou fanau ina ia latou avea ituaiga tomai lea. E leaga o le atinae o Samoa e taua tele i latou, e i ai professions, aemaise lava le faainisinia ma architects o latou e tusia ata. O ata o fale, ma ata o uafu ma mea faapena. ma atinae tetele. O le ala lena e faataua ai aoga a fanau, ma sikolasipi, leaga e soosoo lava mea ia e lua lau Afioga i le Fofoga Fetalai. O le vaai mamaao lena a le HRPP ma faipule uma o le Vaega lenei, o lo o i ai le vaai mamaao. Ia tatou le faia mea uma nei, o taeao le aoga. A o mea e fai mo tatou o lo o soifua pea

ma fanau o le lumanai. O le vaai mamao lena a le Malo ae faalagolago i le musumusuga lilo a le Agaga Paia, e aumai ia i tatou ma le loto maualalo ma le loto toa e faatino ai.

Lau Afioga i le Fofoga Fetalai, o le toe fesoasoani atu lena, o mea ia o lea ua faataoto ma e tatau ona faatino, i le tatou agai atu i le 5 tausaga lenei. Ua tau tuai te isi ona o le Koviti-19, lea e taofia ai i latou ia fesootaiga ma i latou o lea ua aumai lo latou finagalo e lagolago mai ia Samoa. Ae o lea foi ou te matauina le tele o le loto faatautee lea e aumai i totonu o le Observer, le loto faatautee o le tagata e le mamao le vaai. E tetee ai i mea nei mo fanau a Samoa mo le lumanai. A e tilotilo la i tagata nei e aumai ai, o tagata o la e maua mea, o tagata o la e lelei galuega a latou fanau. O tagata e tele a latou taavale, a latou pisinisi taavale. A o lea e taumafai atu ia ituaiga atinae e maua ai galuega a fanau. Ma o le toatele o tatou fanau, o lea ua iu mai isi, a o la e tau sue ni galuega. O i lea e ave i ai le faamuamua a le Malo, o galuega e maua ai galuega a tatou fanau nei ma le lumanai.

Lau Afioga i le Fofoga Fetalai, o le toe faamalamalamaina atu lena, o le mataupu na laga e le sui usufono aemaise o le faataua o le itu lea, o le atinae lenei o le uafu ma le taulaga i Asau faapea foi o le taulaga i Salelologa, e faapea foi i le taulaga i Aleipata i se taimi mulimuli. O mea uma lava nei, o atinae tetele ia e aoga i lo tatou atunu, ma tupulaga fai mai.

FOFOGA FETALAI: Ia malo faafetai. Amuia foi le sui usufono o Alataua Sisifo, o lo o faapena ona tulai mai ma tulai atu le... O lou taua o atinae ma fuafuaga e pei ona faataoto i ai. O oe o le Taitaifono o le Komiti o Tupe, o lena e te saunoa i le tulaga o itu o lea e matauina, o fuafuaga alu mamao lena a le Malo, o lea e faamanino. O lou tulai mai lava ma faamanino e le malo aua le faafogfa mai a le atunu, i le faamaninoga a le Palemia. Amuia foi aua e faapena ona fuafua mamao, a lelei nei, ua manuia taeao. E pei e faapena le agaga o le Malo, ia e i ai lava le tagata faitio, o lona lava olaga o le faitio. E poto e faitio ae le iloa fai tonu, e faapena upu a le atunu. O le tagata lava e maualuga le faitio, e tasi lena tagata e le iloa fai tonu e na o le faitio lava. Aua a fai atu e aumai la le tonu, e leai e le iloa fai le tonu, e na o le faitio lava.

Tulai mai le sui usufono e faaaauau le saunoaga.

Afioga ALIIMALEMANU ALOFA TUUAU: Lau Afioga i le Fofoga Fetalai, faafetai mo avanoa e faamalamalama atili ai ni manatu o lenei itumalo. Ae se i fai lava sina tala puupuu i le vaaiga aoaatetele i le tamaoaiga.

O le oo mai i le Palemene i lau lauga faataupou i le 2016 ou te iloa e le o manatua e se isi, sa ou talanoa ai, o Samoa o le atunu faamanuiaina e le Atua. Ma e le i suia lava lena mautinoa, ua atili faatumauina i tulaga ua tatou matauina i lo tatou lalolagi ma le siosiomaga, i le tele o atunu e matua malolosi o latou tamaoaiga, ua le mafai ona tali atu i le faamai ua lofia ai le

lalolagi. Ae a Samoa? E leai so tatou mafai e gafatia ai ona tatali ooooga tiga o lenei faamai. Na o lo tatou Atua lava le tali ma lē e laveai ia Samoa. E ui lava o lo o i ai luitau mai lea taimi i lea taimi, a o le mautinoa lena, o Samoa, o le atunu faamanuiaina e le Atua. E le toe tau faailo le aafiaga ogaoga o le Koviti-19 i luga o tamaoaiga uma o le lalolagi, ae faapena ona pueia ai foi ma lo tatou lotoifale, ona o le fesootaiga o le tamaoaiga o Samoa i le tamaoaiga o le lalolagi, lea e faalagolago tele i fefaatauaiga o oloa ma auauanga ma tagata, le Trade ma le tourism. Ma o lea tatou te iloa lelei, e le na o Samoa o aafia ai i le tamaoaiga, e leai se atunu o le lalolagi o sao mai ai. O a tatou tapu la ma faiga faavae na fausia ina ia mautinoa le maualuga o le puipuiga o Samoa, ua faapena ona aafia ai lo tatou tamaoaiga, ae le i faitauina ai le tulaga maaleale o Samoa, i suiga o le tau ma faalavelave faale-natura. O le agaga faafetai, o lea e tulaga lelei pea ma faatupulaia le sao o tupe faamomoli mai fafo, e ui lava o la e foi e i ai aafiaga i tamaoaiga o Niu Sila ma Ausetalia ma Amerika e ono aafia ai galuega a o tatou tagata o lo o lafo mai tupe i aiga, a o lea lava e faamauina pea le siitia o tupe faamomoli. E ui o lo o i ai toatuga i tamaoaiga ona o aafiaga e le oo i ai se tatou malosi, ae o lo o mafai pea ona tali atu le Malo e auala lea i fesoasoani, stimulus package ma atinae tetele o lo o faaauau pea, e faapea foi faiga faavae e tali atu ai i nei luitau.

O faiga faavae nei ua tulai mai ai tatou tupe faaleoleo faaagaaga i le faaiuga o Tesema 2020 i le \$751.3 miliona. O lona uiga, afaei i ai se tulaga ogaoga e aafia ai le atunu, o lo o mafai lava ona faatauina mai oloa faaulufale mai fafo i la atunu po o imports mo se vaitaimi e tusa ma le 11.9 masina, lea foi sa taua e le sui usufono mo Faleata i lana saunoaga i le aso ananafi. Ou te faafetai ai lava i le Atua o lea e faavae i ai Samoa.

Ona oo mai lea o se faamatalaga lau Afioga i le Fofoga Fetalai i Tala Faatatau o Tupe. E taia soo i le faalogo le talitonuga lea, lea foi sa faasalalau mai talu ai nei e nisi o alaata o le TV, fai mai o lea e tele tupe a le Malo, e leai se mea e popole ai, na ona o mai lava faatino loa ma faaauau galuega fai. O se talitonuga na faaosofia ai le fia malamalama atili o lenei itumalo, ma iu ai ina ou fesili foi au i le fesili lea sa fesili ai foi nisi o sui usufono i le Fonotaga lenei. O fesili; fai mai, pe sa faapefea ona fau Samoa? Pe sa faapefea ona faatino le galuega lea sa fauao faupo e i latou na muaimalae o nisi foi o tuaa ua lagomau mai tiasa, fai mai sa fau mai puapuaga? Ona o lea tatou te talanoa i le Tulafono o le Tala Faatatau o le Tupe, ona ou toe faaupuina lea o le fesili e faapea; pe sa faapefea ona fau mai Samoa i le tulaga tau tupe? Pe sa faapefea le folaua mai a lenei Palestine i tulaga tau tupe? Ona ou manatua ai lea o le folaua a le fanauga a Isaraelu ina ua o ese mai le nuu o Aikupito o le mea sa nofo pologa ai, lea fai mai e 40 tausaga o taase solo i le vao. Sa fetaiaina ma puapuaga, ae sa i ai lava aao alofa o le Atua i le folaua a Lona nuu. Masalo pe ai sa faapena le folaua. Ma ou te

faatepa ai lenei Maota i le 40 tausaga talu ai i faamaumauga i le amataga mai o galuega a le Faigamalo o lo o i ai nei.

O le Tala Faatatau o Tupe i le 40 tausaga talu ai i le 1980, o tupe faaalu faaletulafono ma polokalame o galuega e \$25.7 miliona. Se i faamalamalama atu lava si mea lea. O tupe alu faale-Tulafono, o tupe ia e totogi ai muamua lava tatou aitalafu i fafo ma totonu o le atunuu, ma e aafia ai le totogiina o le Pulega, e aafia ai Le Ao o le Malo, le Sui Tofia, e aafia ai foi le totogiina o le Tafatolu Fefaatauagai lea e i ai le Palemia ma le Kapaneta, o le Palemene, Faamasinoga, Ofisa Suetusi. O nisi na o mea tau tupe o lea e alu i lalo i i i le faaupuga lea, o tupe alu faaletulafono. A o polokalame o galuega, o auaunaga masani ia, o le totogiina lea o tagata faigaluega uma a le Malo, lea o lo o faia le auaunaga masani i lea aso ma lea aso. E i ai aoga, o falemai, eletise, suavai, fesootaiga, o auala, o faatoaga, o Faamasinoga, o auaunaga eseese, lea tatou te maua i aso uma. O tupe alu la faale-Tulafono ma polokalame o galuega i le 1980, e \$25.7 miliona. O tupe sa faaaluina i atinae, e \$7.7 miliona. O le aofaiga o tupe alu faatatauina i le tausaga lea, e \$33.4 miliona. O tupe na maua i totonu o le atunuu na fuafua e aoina mai, e \$31.3 miliona. O a tatou nonogatupe, e \$2 miliona. O tupe sa faameaalofa mai a tatou paaga, na o le \$210,000. Ua uma le 10 tausaga ua oo mai i le 1991. O tupe alu faaletulafono ma polokalame o galuega, ua sii i luga i le \$44.6 miliona. Tupe na alu i atinae, e \$53.3 miliona. O le aofai o tupe na alu faatatauina, e \$97.9 miliona, ua faatoluina pe a fua i le 10 tausaga na tuanai ai. Peitai, i le \$97.9 miliona lea, o tupe maua na faatatauina i totonu o le atunuu, sa na o le \$67.8 miliona. O tupe faameaalofa mai paaga e \$18.8 miliona ma nonogatupe, e \$11.4 miliona. Ua tuanai lena 10 tausaga ua oo mai i le 2001. O tupe alu faaletulafono ma polokalame e \$243.7 miliona. Tupe faaaluina i atinae, toeitiiti lava faaluaina, ua \$93.9 miliona. o le aofaiga o tupe faaalu faatatauina, e \$337.6 miliona. Peitai, na pau o tupe na mafai ona aoina ma maua mai totonu o le atunuu na fuafuaina, na o le \$232.2 miliona. O tupe faameaalofa mai paaga e \$74 miliona. Nonogatupe, e \$31.8 miliona. Ua mavae le isi 10 tausaga ua oo mai i le 2011. O tupe alu faale-Tulafono ma polokalame o galuega, ua faaluaina e \$522.1 miliona. O tupe alu i atinae e \$224.8 miliona. O le aofaiga atoa o tupe faaalu mo le atinaeina o le atunuu ma galuega ma auaunaga i lea foi vaitau e \$746.9 miliona. Peitai, na pau tupe sa maua mai totonu o le tatou atunuu, maua mai lea i tiute ma lafoga ma auaunaga eseese, sa na o le \$472.4 miliona. O tupe faameaalofa, \$123.8 miliona. Nonogatupe, \$149 miliona.

Ua uma le 10 tausaga ma ua oo mai i le tausaga tonu lava lenei e 40 i ai tausaga. I tupe faaalu faale-Tulafono e aofia ai ma le Tala Faatatau o le Tupe Muamua lea tatou te talanoaina nei, e \$851.2 miliona. O tupe alu i atinae, e \$125.3 miliona. O le aofaiga atoa e \$976.5 miliona toeitiiti lava piliona le aofaiga atoa o tupe alu faatatauina. Peitai, na pau tupe ia e fuafua e ao mai e

le tatou Matagaluega o Tiute ma Tupe Maua, e \$593.1 miliona. E le taitai ona lava. Tupe faameaalofa, e \$255.8 miliona. O nonogatupe, \$11.4 miliona.

Lau Afioga i le Fofoga Fetalai, ua ala ona ou tolaulauina nei fuainumera tai 10 tausaga ma tolaulau, ona o lea ua iloa ai i i e lenei itumalo, e leai lava ni mau tupe a le tatou Malo o i ai, ma e le lava tupe maua i totonu o le tatou lava atunuu i tausaga taitasi e totogi ai auaunaga masani po o polokalame o galuega. Tatou te faamoemoe i tupe faameaalofa mai a tatou paaga, faapea nonogatupe i tuutuuga mama le tului, ina ia faalava ai auaunaga masani ma atinae o le atunuu. Pe tuu foi i se gagana lata mai, e faapalenai ai tala faatatau o tupe.

Ona oo mai lea o se tala i tupe faameaalofa...

FOFOGA FETALAI: Ia, se i tulai mai le sui usufono mo Falealili le Afioga ia Fuimaono.

Afioga Fuimaono Teo Samuelu Teo (Falealili Sasae): Lau Afioga i le Fofoga Fetalai, o le saunoaga a le Taitaifono o le Komiti Tupe, ua pei o se matagi e agi malie i fisaga i le faafofoga a le Palemene lenei, a o se matou faalogologo. O le naunautaiga o lou sui usufono, maumau e, aua o le tasi lea vaega na fesili ai i latou o lo o avanoa nei nofoa, o le tatou Budget Support pe faapei le vaeaega. Ae ofo lava lou loto i le leva ona saofafai i totonu o le Kabeneta ma i latou o... ua tatau ona manino i vaega ia a o lea ua toe fesili, pe faapei pe faapefea. A o le aumaiga e le sui usufono mamalu, se ua faafetai. Afai foi ua le afifio mai, talosia a o faafofoga mai i ai i se taimi ina ia manino ai, aua tasi lea mau o lo o tauave pea. Talofa e ia Samoa, e le i fananau mai fanau latou te totogiina le aitalafu, ua \$2 piliona, pe faapei i ona totogi. Ia lea ua faafofoga lava le atunuu atoa i le vaeaaina ma le faatupeina o tatou atinae ma tupe maua. Aua o le mau tauloto, se a sui le Malo e le o ni latou tupe, na ona o atu lava o le tatou Faigamalo fou o ese latou ae o atu tatou na o le faasoa. E faasoa la le a? Ae faapefea ona maua tupe e faasoa?

O le ala lena e momoli ai le agaga faafetai o lou sui usufono, ua faafofoga lou itumalo, atonu e i ai foi nisi lagona faapena o i sui o lou itumalo, lea ua manino le faafofoga a le atunuu. Faafetai tele mo le faamalamalamaina. Aua o lea ou te manatua lava, 2018, toeitiiti lava piliona le tatou tupe lea na faatatau mo atinae ma tupe faaalu. Ae o lona uiga, afai e 2 piliona lea, oka. O lea ua manino. Faafetai. O le ala lena o lou tulai, leaga e le mafai ona ou nofonofo ae le faaleoa le agaga faafetai lea. Ua manino vaega uma, o le tupe e maua, o le tupe e faaalu, o le tupe e faaagaga, o le tupe faameaalofa mai, ia o le tupe foi e aumai i a tatou paaga e mama tului, ia ua manino ai. Faafetai.

FOFOGA FETALAI: Faafetai saunoa. Ia, malie se i tulai mai lava le Palemia ona tuu atu lea o le avanoa Leala.

Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fatalai, ua ou tulai atu e faamalo foi i le tapenaga a le Taitaifono, ae lelei ona ou faamatalaina atu faalauaitele le itu lenei. O le mea foi ua fai sina umi o ou Minisita o Tupe. E 18 tausaga o ou Minisita o Tupe, e aofia ai ma le 2 tausaga na take over ai au ina ua faamavae mai le Afioga ia Faumuina, i le tele foi o faitioga aemaise lava le Tamaitai Sui Palemia sa nofo i ou tafatafa, lea na silasila i ai le Maota nei ua faamavae Faumui, ona o le tele o tuuaiga le faavaea i lena taimi. Ia ona ou toe tauavea ai lea o le tulaga o le Tupe, e aofia ai foi ma ni nai tausaga sa ou Palemia ai. A tuufaatasi la le 18 lea ma le 22 tausaga lea na ou Palemia ai, ia o lona uiga, ua feoloolo lava si ou malamalama foi i mea tau tupe.

Lau Afioga i le Fofoga Fatalai, e i ai le taimi sa ou tulai mai ai ma pagatia sa feagai ma le atunuu, ua bankrupt, e le mafai ona alofia upu na. O le itu la taua, ona o lea na oo le saunoaga a le sui usufono mamalu i le itu lea. O le fesili; ona o lea lava e o le vaega lea e le o nofoi mai i i ma tautau atu i tagata lo latou le malamalama i vaevaega o mea nei o tofiga. O le Taitaifono o le Komiti o Tupe, o le sui lena o le Palemene lenei, ma latou uma o lea e i ai. O le a le latou galuega? E tulaga ese lava le Palemene, tulaga ese le Malo, o au lea ma le Kapaneta ma le aufaigaluega uma a le Malo, ae tasi lava le tagata la e nofonofo ai i o e taua i le itu lea, o le Suetusi Sili a le Malo, e lipoti sao mai lava i inei i le Palemene e le avatua i le Kapaneta le latou lipoti ina ia sao mai lava i inei, ona o ia foi o le auauna a le Palemene lenei.

O le Tamaitai la lea Taitaifono, o le sui o outou uma, e na te siakiina uma le matou galuega lea e fai ae lipoti mai e le Matagaluega, ona tapena ai lea e le Suetusi Sili o le latou lipoti, o sao lava e sue tusi ma aumai sao lava le lipoti i le Tamaitai Taitaifono ma lana Komiti, ona latou vailiilia loa lea o faitioga faasaga mai ia te au ma le Kapaneta ma Matagaluega uma po o i ai se faaletonu i le latou faatinoga. O lona uiga la o le molimau atoa lea e aumai e le Taitaifono, o le molimau o latou o sui usufono o le Maota lenei faasaga mai ia te au ma lau Kapaneta ma le aufaigaluega atoa uma po o i ai se faaletonu i le latou faatinoga. O lona uiga la, o le molimau atoa lea e aumai e le Taitaifono, o le molimau o latou o sui usufono o le Maota lenei e faasaga mai ia te au ma lau Kapaneta ma le aufaigaluega atoa a le Malo.

Ina ua ou faatoa faigaluega, na alu atu ai le Suetusi Sili e sue le galuega, a o le taimi lea o le 1971 ua toe tofia loa au e avea ma Sui Faatonu Sili o le Matagaluega a le Atinae i lalo o le taitaiga a se tasi foi o Faauluuluga matua i lena taimi o le public service, le Susuga ia Hans Kruse. Ia, e matuia foi le lipoti a le Suetusi. Ona ou tapenaina ai lea o le tali, le tali e aumai i i i le Palemene. E le i umi ae valaaulia loa le matou Matagaluega, ona ou sau foi lea ma o mai ma lou Pule ma saofafai i luma ma aumai foi... i le taimi lea o lea e Taitaifono Vaai Kolone, ae le i i ai ni faiga Pati i lena taimi. Ia ona saunoa mai lea o Vaai ia te au, “Outou ia o le aufaigaluega a le Malo, ia

outou faamaoni.” O le Sui Taitaifono i le taimi lena o Lauofo Meti. O Lauofo o se tasi o tama na i ai lava i le taimi o Niu Sila. O le tele o lona taimi o understudy ina le faagaoioiga o le Malo i le taimi lea, o le isi la lea toeaina o le tulaga o le malamalama i faiga faa-Palemene, sa ia matau taualumaga uma o le tatou Tutoatasi, ma e i ai le tusi tele lava na tusia e Lauofo Meti, o le tele ia o le poto lena e sau ai i ina i le fesuiaiga o upufai o Malo, ma le tulai atu o tatou e avea ma Malo Tutoatasi. O ia la lea sa sasaa uma i ai le malamalama o papalagi i na onapo. O lona uiga, e Tutoatasi tatou ua lava taoso tatou i le toeaina lea, e i ai foi Feesago sa gafa ma le pulega o mea tau... i inei i le Palemene.

Ua ala ona ou taua le itu lea, ona o talaiga ia e fai nei, e pei e atili atagia ai le lē malamalama o i latou nei i le galuega a le Taitaifono. O lea foi po o ananafi ea foi na ou faalogo atu i ai, o lea e tau silisili foi e i latou nei le tulaga o le Taitai o le Maota. O le Taitai o le Maota, o mea lava ia e fai e Palemene uma. A o le faalavelave o le lē malamalama ai, e fai atu le faatalanoaga o Tulafono Tumau ma tagata e o mai fafo e faamatala uma le taua o mea nei, ae o la e lava e le malamalama. Ou te manatua ai le talasua foi ma talaata a le isi o le Au Tusitala na o atu, ia ua talatalanoa foi ma se tasi o latou ma faapena ane ai, se se i fai ma alolofa mai, ia latou ia, se ua matou le lavava foi talapepelo. Ia o le mea lava lena o lea e fai nei, e fai lava ma le malamalama. A o le itu taua lea ua aumai e le sui usufono i lona faitauina aua o le sui usufono foi, o se tasi lenei Star a le Sosaiete a Suetusi a Samoa, e tele foi taimi o galue i Faalapotopotoga faava-o-Malo, ua faamavae mai ai i ina ae sau e tautua le tatou atunuu. E le uma ma e le galo foi ia te au le lauga a Professor Aiono i se tasi o mafutaga na ia saunoa ai, “Ua ou tuua au galuega i Niu Sila, o au o se tasi sa auina i fafo, sikolasipi, tele lou malamalama ma maualuga ou tulaga, polofesa foi i le Iunivesite i Dunedin, a ua tuu uma ia mea ae sau i Samoa e faaaoga lona tomai e tautua ai o le Malo na maua ai le poto, o le Malo na auina atu i fafo.” O lea la, o i latou uma nei ua toe taliu mai ma galulue mo le tatou Malo, e malamalama lelei i tiute tauave, tiute tauave. O lea foi la ua aumai lana folasaga, o se folasaga e matua oooo aemaise le faamaninoga maiga o mea nei o tupe a le Malo. E 2 lava ituaiga tupe a le Malo, a faatamala ai le vaai a le Malo, e oti ai lava i i le faafoega o le tatou tamaoaiga. O le teugatupe o tatou lava tupe e maua i totonu o le atunuu mai lafoga ma tiute e totogi ma le teugatupe a isi atunuu e auala mai i a tatou fefaatauaiga ma fesoasoani foi e aumai mai fafo. A oo la ina faagaoioi a tatou fefaatauaiga, na o le pau lava lena o tupe e faaaoga, o tupe ia a Malo i fafo. O le ala lena o lea e ala ai ona taua tele ma faatu ai e le Malo lenei i le tausaga 1984, faatu aloaia ai le faletupe tutotonu e fai ma latou tiute le faafoefoeina o tatou teugatupe nei. O le galuega atoa lena, o le auau atoa lena o le galuega a le tatou Central Bank, e mataitū lelei le faagasologa o tupe maua mai ma tupe e avatu i fafo. O le ala foi lena, o tupe uma lava mai fafo, e le mafai ona tala i totonu, e ave uma

lava i o e teu ai i le tatou Faletupe Tutotonu ia aua ne i toe see atu tatou i le mala papala lea na i ai tatou e leai se tupe e oka mai ai oloa, aua foi e le lava teugatupe ia mo fefaatauaiga. O lena la, lea e mataitu lelei, lea e oo mai lava i le taimi lenei, o le taimi pito sili lea ona matautia ua alu ai i lalo teugatupe a atunuu i fefaatauaiga. A o le a le mea lea e tupu? O lea e posiposi lelei e i latou ua foi mai fafo ma aooga i le faafoefoeina o teugatupe nei mo tatou fefaatauaiga ina ia sologa lelei.

Lau Afioga i le Fofoga Fetalai, e soolua mea ia, aua a soona faaalu foi la tupe mai teugatupe o tatou lava tupe, o le fesili e tulai mai, o a la mea e te faaalu i ai? Ia e te alu e faatau ai le pisupo, alu i fafo na tupe. E te alu faatau mai ai ofu e sui i fafo, toe alu i fafo na tupe. O lona uiga, e soosoolua lava mea ia. O le ala la lena e te mataituna le isi ae e te tilotilo foi i le isi itu, aua o le siisii o tupe e uu i lou lima o tatou lava tupe, o le faaiuga, e aafia ai ma tatou tupe ia, tatou teugatupe mo fefaatauaiga.

Lau Afioga i le Fofoga Fetalai, o le soolua lena e taua tele lava, mataitu lelei ma lipoti mai e le Central Bank, lipoti mai i le Minisita o Tupe, lipoti mai i le Minisita o Tupe ia i matou, lipoti foi e latou ia te outou Komiti a le Palemene, ina ia silafia uma ai e lala nei o le Malo le mea o lo o i ai le tulaga tau tupe ma le tulaga tau aitalafu. O lea foi e aumai le Tala o le Tupe Autu, o la e sau uma ai lava tatou aitalafu, e leai lava ma se mea o nanaina, o la e sau uma ai lava ma le tulaga o le tatou capacity, le tatou malosi foi lea e totogi ai tatou aitalafu, debt service capacity. O lea la e faamasino ai e tatou uma i taimi uma le tulaga o i ai le faagasologa o tatou malosi tau totogigatupe, e leai lava se mea o faaletonu. Aisea? Leaga o tagata tonu o la e faafoea mea ia, o tagata ua uma ona train. O le tele o taimi sa galulue ai le toatele i le IMF, sa galulue ai i le World Bank, sa galulue ai i o i le ADB. O faiga faavae ia a le tatou Malo, e ave tama fanau e aooga i fafo ona toe foi mai lea toe ave toe train i totonu o faalapotopotoga tetele nei ina ia foi mai galulue a ua malamalamama lelei i gaoioiga o lo o fai e Faalapotopotoga nei. E omai la i fafo ae omai i inei i Samoa ua matua lelei atoatoa tapenaga e fai e tatou tama fanau. E oo foi la i le faatulagaga o le Budget lea e faatulaga mai i le vaega lenei o le atinae, o le strategy ma le tulaga o le faagaoioiga, current expenditure.

Lau Afioga i le Fofoga Fetalai, o le taua ia o le faatulagaga lena muamua, statutory. O le a le uiga o le upu statutory? O le vaega faatulafono lea e i ai tatou aitalafu ma isi mea ia sa taua e le sui usufono. O le a lona uiga moni? O lona uiga moni, o i faatulafono o lea e taua ai le dignity of this nation, O le mamalu o le Malo lenei. O le a la le consequence, o le a le uiga o na mea? E le tagofia e le Palemene lenei, se iuga e ono tuuitiitia ai leaga o i lea e taui ai le mamalu o le atunuu lenei, the dignity of Samoa. O le ala lena a aumai, e oo lava upu i le tulaga e ono toe sui ai le current ma le development. Ae le mafai ae le mafai ona suia le statutory. E leaga o lea e taui afifi ai le mamalu, o le tatou atunuu, i le tulaga o le totogi aitalafu. E leai lava se mea o afaina,

o le ala foi lena. E leai se Malo e faatamala i mea ia, o Faalapotopotoga, e ave se tupe i se atunuu, e avatu soona fai. Ma o le mea lea e te i tei lava tufa i lea tufa i lea. O le ata aupito sili lea, mo mea o Faigamalo soona fai. E soona fai a latou mea e le malamalamama i le mea e faavae ai ia fesoasoani ia e aumai mai fafo. E na o le pau lava le mea, e oo loa le Malo lenei, e fai ni mea faaletonu faapea, tipi loa ma le fesoasoani. Ona tago loa lea i le a? Ia ona tago loa lea e milimili le ulu. Ua leai se mea e toe sau.

Lau Afioga i le Fofoga Fetalai, o lea foi ua vaai atu ua oo mai le taimi o le malologa. Ia manuia tele lenei taeao.

FOFOGA FETALAI: Malo. E ese le manaia o le faafogafoga i se faapupulaga o se mea. Malo faafetai, e faapena le faatinoga o a tatou Fonotaga. E fefaamalamalamamaai itu e lua. O lea foi ua manino, o le tulai mai o le Taitaifono, ia o ia lea o le sui usufono o le Palemene. Aua o le Komiti a le Palemene lea e Taitaifono ai, o le Komiti o Tupe a le Palemene. E momoli atu foi le faafetai i le Taitaifono, ona o lea na te vaevaea mai tai 10 tausaga, le eseesega mai lea 10 tausaga ma lea 10 tausaga. E ese le manaia i le faalogologo ma le matau, a o lea foi ua toe palelæi le saunoaga a le toeaina. O le toeaina lava o toeaina i le mea tau tupe. O le mea la lea, ia malo faafetai. Ae a leai la se tupe, ia tatou o loa e fai le tatou ti.

Ma ou te faasilasila atu, o le a faataatiae galuega a le Fono Aoao mo lana malologa.

Na faataatiae Taualumaga a le Fono Aoao Faitulafono mo lana malologa masani i le itula e 10:52 i le taeao ma toe faaaauau i le itula e 11:35 i le taeao.

Na toe faaaauau felafolafoaiga i luga o le faiotauga faalua o le Tulafono Tau Faaofi o le Faatatauina o Tupe Faaopoopo (Nu 1) 2020/2021.

FOFOGA FETALAI: Ou te faasilasila atu ua toe amatalia Taualumaga a le Fono Aoao Faitulafono. Ia faamalo le onosai, malo foi le usufono. Ou te manatu ua maua le faasiliga malosi e faaaauau ai le tatou galuega. Ua ou tapa le Afioga i le Taitaifono, ae o lea sa matauina na tulai mai le sui usufono mo Faleata i Sisifo. Le Afioga ia Lealailepule, pe i ai se mea sa...

Tofa Lealailepule Rimoni Aiafi (Faleata Sisifo): Ia faafetai tele lava mo le avanoa. E leai, o si vaega laititi lea lau Afioga. Ae muamua ona momoli atu le faafetai tele i lau Afioga ma le mamalu o le Ofisa i le malu taeao a le Palemene ma tatou uma. Ua tele lava le suiga mai ananafi, e momoli atu ai

le faafetai tele. O le olaga lena o Samoa e alu i luma Samoa e le alu i tua. Ae taua le vaega lea ua oo i ai le faamalamalamaga a le Taitaifono o le Komiti o Tupe. E muamua lava, o lea na toe faalautele e le Taitai o le Malo, le tupe lenei Statutory Expenditure, a o le Tulafono e tauai ai mamalu o le Palemene, ona o lea e totogi ai ma tatou, totogi ai ma sui usufono. O lona uiga e totogi ai ma sui ia lea e le o mai i le Fono, ae o e fai lo latou loto...

FOFOGA FETALAI: Malie lau Afioga Lealailepule se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O se mea e fia faamalamalama. O le dignity of the whole country, o Taitai o Samoa, e le na o le Palemene. E leaga o lea foi e i ai i totonu ma tulaga tofi mamalu. Ae le gata la i lena, o lea e i ai i ma seleni ua faavagavaga mo le totogiina o aitalafu. O lona uiga la, o le mamalu atoa lea o le Malo i ona tulaga tofi, ma le mamalu o Taitai o Samoa o alii ma faipule. E faapea foi ma le mamalu o le nofo a faafeagaiga, o latou uma na, o lea e i totonu i i, ua taui atoa le latou mamalu. Aua e le mafai loa ona totogia aitalafu ia, tauvalea uma lava. Amata atu lava i Faauluuluga o le Malo, Le Ao o le Malo, e tau lava i alii ma faipule, o tupu ma ee o Samoa na tofia i tatou. E le pumoomoo la, o le ala la lena a vaai i ai i le faatulagaga. E 1, statutory, o lona uiga, these are the funds protected by law. E puipui ai le mamalu o le atunu atoa, e le mafai la ona tagofia e le mamalu o le Palemene lenei e taofi. E le mafai foi ona oo i ai se suesuega a le Komiti pe faapea mai e tipi ese. O le ala foi lena e faanumera 1 ai. A totoe mai ai se tupe i ina, ona faatoa mafai loa lea ona faagaoioi le Malo. A totoe mai ai ni tupe i ina, ona faatoa mafai loa lea ona alu le atinae. A matau mai la e tau mai lava i le taimi lenei, talu ona tulai mai le HRPP, o lea e alu uma lava mea ia e 3. 1. Statutory. 2. Maintainance. 3. Atinae. O lea e alu lava le atinae, ae le o se tamai atinae. Lau Afioga i le Fofoga Fetalai, o le faaopoopoga lena, e le na o le Palemene a o lea e afifi uma ai le dignity of the people of Samoa and its leaders.

O le ala lena e taua tele ai le malamalama i le faatulagaga, lea e aumai ai e le Minisita o Tupe ma lana Matagaluega. E mai lava i le amataga, e numera 1 lava le mea lea. O se isi lava la e faapea mai ua le mafai ona totogi aitalafu, o le matua vaivai. Ona o lea e Nu 1, Nu 2, Nu 3. E sao le upu lena pe a tilotilo mai ua leai se Malo, ua leai ni tagata e totogi, ona faatoa sao lea o le upu lena. Ae fai e tagata e le malamalama, ua leva ona saofai i totonu o le Kapaneta ma o atu ia Matagaluega ma faamalamalama faafia e le Minisita o le Tupe a o lenei lava e le malamalama. A na se i faapea e o e fai le talaiga, ae aua ne i oo i ai se upu i i, aua, aua le oo i ai se upu, e le iloa e nisi e matua vaivai tele. Ma le mataga o le taimi umi, sa saofai ai i totonu o le Kapaneta, saofai i Komiti a le Palemene, saofai o le Fofoga Fetalai. O le a faapefea la

ona o mai e taitai le atunu, e taitai pogisa, a o lea e pogisa i le ute o le galuega a le Palemene lenei ma le Malo.

Lau Afioga i le Fofoga Fetalai, o le toe faamalamalamaga lena, e fesoasoani atu ai. O lea e saunoa le sui usufono, e taua tele lona toe laga o le mataupu lea, ina ua uma le tatou vai vevela.

Tofa Lealailepule Rimoni Aiafi: O lea ua faamalamalama e le Afioga i le Minisita i sui usufono lē malamalama. O sui usufono e le i o mai a o lea e totogi i tupe la ia, lea na tau oo i ai lau faaueilavea.

A o le mea lea ou te tulai atu ai lau Afioga, o latou tala ia e ave i tua, a faitau. Lea e faapea mai, a foi mai e fai le suesuega i tupe na aumai i le misela. E fai le suesuega i tupe na aumai i le Koviti-19. O lona uiga o le fasifuaiupu lea ou te fia laga, e oo i ai le saunoaga a le Taitaifono. O le fuaiupu lea faapea, se i foi mai i totonu. O le a le uiga o lea tala se i foi mai i totonu? O lea e i totonu. O lea e i le Palemene ia tagata nei. O i, o mai e fesili mai i ai, ona avatu lea o le faamalamalamaga e le Malo, Taitai o le Malo, Minisita o Tupe ma le Taitaifono o Tupe. A o lea e faapea mai, le nusipepa lea e i ou luma lau Afioga, matou te o atu loa i totonu, fai loa. Ou te le o malamalama la...

FOFOGA FETALAI: Se i toe tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o le mea e fia faamalamalama atili. Aua o le saunoaga a le sui usufono o lo o saunoa nei, e o mai i totonu. A lea sa i totonu, ma faamatala faafia atu le \$11 miliona foi lele. O le \$11 miliona foi lea o le tatou Tala o le Tupe Autu lea e faagasolo. O lea e aumai i o i le World Bank, a o lea e tau fesili. A o fea la le \$11 miliona mai le IDA. Ua faamatala faafia, faamatala faafia faamatala faafia i totonu. O le IDA o le lala lena o le World Bank, a o la e oo mai nei o la lava e fai. E leai se mea e ese ai ma le tagata foi lele, ua molia i o i Niu Sila i le mea lea o le lima tagoese. Ia molia loa, ona sau loa lea o le faasalalauga i i, se o le tama e sau i Apia. Ae faapea se tala a le tagata, a o la e alu i o, o le tama mai Samoa. Ona faasao foi lea, se o Apia ma Samoa o le mea lava e tasi. E faapena e i ai ituaiga tagata faapena, e le talatala le mafaufau. E te fiu lava la e faamalamalama, sa nonofo i i ma faamalamalama atu i le Tala o le Tupe, faamalamalama faafia, faamalamalama faafia. E pau lava le mea taua mo le itumalo o le faafogafoga mai. E aumai tagata faapea, e fai ma sui o le itumalo, e faamalamalama faafia, e faamalamalama faafia, e le malamalama. O lona uiga, o le taua lena o lau mataupu lea na laga, e lelei ona ou tulai atu, sa i ai i i, sa i ai i i, i le tele o mea. A o lea ou te faalogo atu lava, e matua leai ma se isi o latou e malamalama. A ua faamalamalama faafia, faamalamalama faafia,

faamalamalama faafia. O le a la le fofo o lea mea? E le o ia i tatou le fofo, o la e i le itumalo le fofo.

Tofa Lealailepule Rimoni Aiafi: Ia faafetai i lau Afioga, ou te le toe fia faoa se taimi o le Taitaifono, atonu ua lava foi lea. Aua o lea ua tatou mautinoa, e fiu e faamalamalama, aemaise o latou sa i totonu. A o lea sa ou tautala ananafi i le literacy rate e 99.9%, o lona uiga o nai itumalo nei, o lo o i ai le pasene lena. Ae i ai isi o le Palemene na o le 9% le literacy rate la e i ai. Ma le faaaloalo lava.

FOFOGA FETALAI: Se i tulai mai le Afioga i le Taitaifono, malo i le sui usufono mo Faleata.

Afioga ALIMALEMANU ALOFA TUUAU: Ia faafetai mo le faaauauina o le lauga a Alataua i Sisifo. Ae o le fesili i le Afioga i le sui usufono mo Faleata, atonu se i oo i le taimi o le Minisita o Tupe, ona ou avea lea i ai. E faigofie lava, ua uma na... i taimi e faatalanoaina ai le Tala Faatatau o le Tupe. E tapa ai foi le Matagaluega o Tupe ma le Ofisa Sili, po o fea ua oo i ai le faatinoga o tatou stimulus package. Ia o le faila atoa lea, o lea e maioio lelei, ae leaga e atoa le aso ma le 2 aso o ou faalauina. E pau lava le mea, e fia faamanatu atu, e le i uma le tausaga faale-tupe. E uma nei ia Iuni, ona aumai atoa loa lea o le Tala o Tupe na faaaogaina. Aua faatoa amata mai le tatou stimulus package ia Iulai o le tausaga lea na tea atu nei. E tatau ona oo loa ia Iuni ua maea foi ona fai le faatulagaga o tupe ma sueina e le Ofisa o Suetusi Sili, e tatau la ona avanoa le lipoti lena. A o le taimi lava lenei, a oo ina fai galuega a le Komiti Tupe, o lea ua maua foi i i le tulaga o lo o i ai. E leai se mea e popole ai, e na o le fesili lava ona aumai lea.

FOFOGA FETALAI: Ia malie lau Afioga i le Taitaifono, se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: E lelei ona malamalama le itu lea, leaga, le itu lea e faapitoa tonu lava i le profession o le Au Tausi Tusi ma le Au Suetusi. E ese lava le vaega latou te tapenaina le Tala o le tupe, ese le vaega e latou te sueina. O le ala lena e ala ai ona eseese igoa. E ese le Au Tausi Tusi e tapenaina le Tala o le Tupe ua faaaoga. E manatua e 2 ituaiga tala, o le Tala Autu Fuafua. O lona uiga e le i faaaluina le tupe, ma le Tala o le Tupe ua faaaluina. O le isi o le Tala o le Tupe e fuafua ona aumai lea i totonu o le Palemene. O lea e faaigoa o le Budget po o le paketi. O le tala lena o le tupe o lea e fuafua, o lea tatou te faapea. O le tupe lena atonu o le a aoina, ae faavae sailiiliga ia, i le tala foi o le tupe talu ai ma le latou vaai i le agai i luga po o le agai i lalo ma le tupe maua ma le tulaga o i ai le

tamaoaiga. O lona uiga la mo le isi Tala o le Tupe lea o le a saunia, e ono i ai se eseesege ona o le afaina o le lalolagi i le Koviti-19. O lona uiga e ono pau agai i lalo, o le mea la lea e aoga foi mo i latou ia e feoai solo ma fai mai. E o mai o i ai tupe, e ono pau ona o le tulaga o le aafiaga o tamaoaiga uma o le lalolagi. O lea foi e aafia ai i tatou ona o le Koviti-19. O le tapenaga la lena o le Tala o le tupe, e faatoa faagaoioi ina ua oo i le aso 30 Iuni. E uma loa la o lea ua uma ona faatoa gaoioi loa lea o le Tala o le Tupe tuufaatasi, e le puupuu la le taimi e fai ai le mea lena. A uma loa la ona tapena le Tala o le Tupe, manatua la, ua ese le tupe e fuafua, a o lea la ua taoto mai loa le tupe moni na faaaalu. O le taimi la lena, e faatoa tuu atu ai loa ia i latou e suea po o sao mea ia na faamaumau e le isi vaega lea o le profession lenei o le Au Tausi Tusi a le Malo lea e i totomu o le Matagaluega o le Tupe, faatasi ai foi ma isi, i isi Matagaluega i tua. Ona tuu atu loa lea i le Suetusi ma le latou Ofisa.

O aso la la, i le taimi faatoa ou amata ai, e na o Tom Overhoff ma le Afioga i le sui lea o Toomata sa i ai i le taimi lena. O le tasi lea official a le alii palagi lena o Tom Overhoff ma le tama lea o Faimanu, e sau mai le nuu o Afoa. E na o i latou la na e toa-tolu, sa i ai ma se tasi foi tamalii mai i Moataa. E na o le toa-fa lava na i ai i le taimi lena. O le taimi la lenei, ua matua toatele, masalo pe ua ova ma le 25 Suetusi la ua i ai nei, o lo o faatalitali mai, e alu atu loa fai loa le latou galuega. Ua ala ona faatoatele e le Malo, o le talosaga mai a le Suetusi Sili, ina ia atoatoa le latou galuega, ma oooo le latou tapenaga. E latou te manaomia ni Suetusi se toatele, lea na talia ai e le Malo. A na faapea e manao la le Malo, e aua le alai tele i mea foi ia, e na o le toa-fa lava e talia. A o le mea lea ua i ai, ua matua lava ma totoe, le aofai o Suetusi o lo o i ai i totomu latou te faatinoina le galuega lea. Ae o lo o i ai foi ma le avanoa latou te tuuina atu ai le isi vaega tele, o Faalapotopotoga ma tala o tupe a isi Faalapotopotoga i tua, i Suetusi ia e i tua. E i ai le Suetusi lea tautaua lea o Betham ma isi, o le toatele ia o mau Suetusi ia e i ai i tua. Ua tatala atu i ai le avanoa lea, e vave ai ona faatino le latou galuega, ina ia vave ona oo mai lipoti i totomu o le Palemene.

Lau Afioga i le Fofoga Fetalai, o le anava lea a le Kapaneta, aua ne i tuai, aua a tuai ona aumai, o le a le aoga? O le a le aoga e aumai ai ua umi? Aua a aumai o la e fresh ina ia silasila i ai Komiti ma lipoti mai ai. A o outou faafogfa mai la, o le a le mea lea e fai? O lea ua tu mai le Taitaifono e laga mai mataupu e faatatau i le faagaoioiga o le Malo. O le a le mea lea e tupu? O lea ua tulai atu Leala, o Leala o ia o le Minisita Lagolago, o le Minisita Lagolago a le Minisita o la e nofo tonu mai lava i ona luma, le Afioga ia Afamasaga. O le ala lena o lea e tali mai ai, e tusa o lea ua faafeagai malolosi ia e 2. O outou o lo o agaia le Malo ma matou o lo o tu tu atu i i. A le lava loa le Minisita, ia tu mai le Minisita Lagolago.

O lea la e faafogfa mai le atunu, e pei o lea e misa, o lea e fusu i totomu. Lau Afioga o le gaoioiga lena, o le upu lea e ave o le Itu Agai, o le Home

Grown Opposition a le HRPP lava ia. O lea e faafogafoga mai, e toeitiiti lava ina a fusu. Aisea? A faapefea o lea e le o nonofo mai. O lea la ua tauave e latou le latou matafaioi, a o la e o tafafao. O le faasilasilaga lena, ina ia atili ai ona malamalama le tulaga lea e taumafai mai ai le Taitaifono. E oo ia Iuni ona faatoa uma lea. A o lea tatou te ia Fepuari, o lea e alu le tatou paketi e le i maea, autu. A o lea ua toe pasi atu ma nai isi tupe faaopoopo, ina ia faaleleia atili ai galuega o lo o manaomia ai nisi tupe faaopoopo. A uma loa Iuni ona faatoa tapuni ai loa lea i ina, o le mea lea e igoa o le tapuni o tusi, ua close. O a la nisi mea e fia fai, ua uma ai i i, ua TKO ua uma le taimi, ae toe amata le tausaga fou ia Iulai. Ona ave loa lea o le Tala o le Tupe ua uma ona tapena, o tupe moni la ia na maua, ma tupe moni faaalu. Ona ave loa lea sue, a uma loa, aumai sao lava e le Suetusi, aumai loa i le Taitaifono e galulue loa latou. E le aumaia ia matou, ona o Tulafono ia faa-Sosaiete a Suetusi, ma o Tulafono foi ia o lea e galue ai Malo. O le tutoatasi o le Suetusi, po o le tutoatasi o le Matagaluega lea, e te faamasino i le mea o lo o agai i ai le lipoti. O i ina le Tulafono e faamaonia ai le tutoatasi, i le mea e agai i ai lana lipoti. Ma le lua, o le appointment, o le filifilia. Lau Afioga i le Fofoga Fatalai, e pei foi la i inei, e le o i o i le PSC, e filifili atu i inei i le Palestene, e fai ai le Fofoga Fatalai. O lo o i ai le pule na te tagofia ai le vaega lea.

Lau Afioga i le Fofoga Fatalai, o le mea lena e igoa o le independence o le Suetusi, o le mea e agai i ai lana lipoti. E agai mai i inei, e leai lava se isi e toe faalava ane, e valivali se isi mea. E sau sao lava i inei i le Palestene. O le ala foi lena pe a matau mai, o lea e pei e inaina atu le Minisita Lagolago, o lona uiga, o la e faaoso e le Minisita, tu i luga, tu i luga e faasao le mea lea. E i ai la isi taimi e tu ae ai i luga... Ia o lea la ua tu atu le Minisita a o lea ua malolo le Minisita Lagolago. O mea lava faapea, o le tatou Maota e fai ai lava nai suaga faatamalii.

Afioga Hon Afamasaga Lepuiai Rico Tupai (Minisita mo Fesootaiga, Faamatlagaga ma Fesootaiga Vavave Faaneionapo): Lau Afioga i le Fofoga Fatalai, o lea ua tu atu le Minisita, o lea ua malolo le Minisita Lagolago. E leaga o la e faafogafoga lou itumalo, faapea ua ou le lava tauave le tofi. Ae leai o lea e tuu le avanoa, e warm up ai le Minisita Lagolago mo le Nofoaiga fou. Ia faafetai.

FOFOGA FETALAI: Se i malie, se i tulai mai le Minisita mo Pisini, Alamanua ma Leipa.

Afioga Hon Lautafi Fio Selafi Purcell (Minisita mo Pisini, Alamanua ma Leipa): Ia o le Minisita lava lea e tu atu. E le o nofo mai i lau tama. Se i faamalamalama lava sina mea lea e le sui usufono mo Faleata. E leaga o le sui usufono o Faleata e fai ma nanu, le upu lea, literacy rate. E leaga o la e faafogafoga mai le atunu. E le o maua po o le a tonu lava le uiga o lau tala lea

e faapea. O lona uiga o itumalo ia, lea e i ai sui usufono ia, po o sui usufono foi ia. E na o le 9% le literacy rate. Se i faamalamalama laititi mai lava faamolemole. E i ai le toatele o le atunu, o la e fia malamalama i le uiga o lau saunoaga lea. Ma le faaaloalo lava.

FOFOGA FETALAI: Se i tulai mai le sui usufono mo Faleata le Minisita Lagolago.

Tofa Lealailepule Rimoni Aiafi: E faamalulu atu lava i le sui usufono i le fai ma nanu o le sui sui usufono o Faleata. O lou faiai e fai ma tau galio i le fale, leaga e tele tele, e le ofi i lou ulu. O le mea foi lena e le faasaoa au e le Minisita, e fuafua lava i le literacy rate o le tagata lau Afioga.

O le uiga o lau tala vaeane le faafogagaaga a Samoa, e pei o le mea lea e fua i ai le malamalama o fanau o le faiatutusi, ua i ai lo latou malamalama. E manatua foi le upu lea na ou taua, so o se tagata lava ua malamalama i le faiatutusi, e faigofie foi ona tele lona aoaoina i so o se mataupu. A o itumalo nei e o mai ai sui usufono nei, e faamalulu atu, o le latou malamalama lea e i ai, e 99.9%, o la e lelei itumalo. A o sui usufono, o lona uiga e fai lava si maulalalo o le rate la e i ai o latou mafaufau. Ma le faaaloalo lava faafetai.

FOFOGA FETALAI: Se i tulai atu le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e taua tele le tulaga lea ua saunoa atu ai ia le Minisita o le Kapaneta. A o le mea lea e faatoatoa mai a tatou saunoaga. A saunoa faa-Samoa a tatou saunoaga, ia malamalama lelei ai lo tatou atunu. E lelei lava le tatou pulupululima o le tatou gagana. O le ala foi lena o lea sa malosi ai lou leo, e ave i i, i le faamasinoga ma i latou o loia uma lava o lea e i totolu o le atunu lenei. O le atunu lenei o Iapani ma Saina, o Iapani e faa-Iapani uma lava a latou loia, gagana. E faapena foi Saina, e faapena foi Initia. Ae oo mai i inei i Samoa, se ua ou le iloa le mea ua oo i ai le fia nanu o tagata. Ae tuu le tatou gagana, o le mea lea a avatu ai Tulafono e faataua le tatou gagana. Ona osofai mai lea o le Palemene lenei, e faaletonu le Tulafono, ae mulimuli ane, faatoa faiatou lelei i felafolafoaiga a le Palemene, ma momoli atu ai le agaga moni o Taitai o le atunu. O le a la le mea lea ua i ai nei? O lea ua gugu faasoloatoa, talu ai le vaivaiga lea e i ai nei i tatou faamasinoga ma tatou loia ia e practice. Ia faaaoga le tatou gagana ma ia o e saofai i totolu o fono a nuu, e malamalama lelei ai. O le mea lea o le aganuu lau Afioga a tatou, o le taleni lena e i ai i matai o Samoa, o le taleni lena o lea e fai ai faailoga BA, MA ma PhD. E faaigoa o le Political Science, o le Sainisi o le Mataupu Faaupufai. O le totonugalemu o le mataupu Faaupufai, o tu ma aganuu e faatonutonu malie ai tagata, ma le tulaga e tatau ona nonofo lelei ai,

fealofani. Ma vaai i le psychology o tatou tagata, e le mafai ona maua le mea lena, e tatou ia faatoa foi mai ma faailoga, seiloga e te saofai i totolu o le fono a le nuu ma e faafogafoga i le tatala maiga o le tofa teu mau. I le tele o tausaga, sa tupu ae ai le nofoia mai e le matai e matua le iloa nanu, le iloa nanu. Ae talu ai felafolafoaiga ma le fefulifulisai faalaau mamafa o mataupu tau le pulega o tagata o le nuu. Ina ia maua ai le filemu ma le psychology, po o le saikolosi faale-mafaufau, e faatupu ai le agaga lelei i totolu o nuu. E masalo so o se matai lava ua leva ona matai, e le iloa pe a ave e faatulaga lelei ia faailoga e tatau ona maua. E masalo po o le 5 o mea o Doctor of Philosophy i mea tau Political Science i le pulega o tagata, aua e tutusa lelei lava le pulega o tagata i totolu o nuu ma le sau toe saofai i i, ma e talanoa i le pulega o le Malo, ia o le Malo o tagata e le o ni Malo o meaola. O le Malo o tagata ma le pulega o le amio e tatau ona fai.

Lau Afioga i le Fofoga Fetalai, o le itu taua lena o le faaaoga o le tatou gagana. Ou manatua ai le faatoa tulai mai o le Malo lenei. Ia saunoa atu Tofilau, ae tulai mai le Taitai o le Itu Agai, fai mai e vaivai lau gagana lau nanu, o le a le tali a Tofilau. O le a le tali a Tofilau? Ioe, o nanu sa ao i lalo o koko, ma lalo o ulu, a o oe, ia fai o le saosaoa o lau nanu, e pei o le alu o le laau suisui, ma faaletonu atu lava ma tupe a le atunu, manuia le tatou Fono.

Tofa Lealailepule Rimoni Aiafi: Lau Afioga...

FOFOGA FETALAI: Ia, se i malie le... e a pe a se i, ia tulai mai Leala leaga o lea sa...

Tofa Lealailepule Rimoni Aiafi: Leai ou te iloa le mea lea e agai i ai le toeaina, le Taitai o le Malo, leai e pei e foliga ua otegia le sui usufono o Faleata i Sisifo.

FOFOGA FETALAI: Leai e te le o maua mai...

Tofa Lealailepule Rimoni Aiafi: Ae manatua foi, a nanu le sui usufono, lou tagata, e uma toe alu atu ma le faa-Samoa. Ou te manao e faamalamalamama leaga o le matou itumalo lau Afioga, se o tamaiti o le town. Ou te alofa foi o le tele o tagata e le malamalamama i le faa-Samoa, o lea o le a taumafai e faapea le faiga o lau lauga foi lea, ia e manatua foi e tele foi ma le au Saina, ma le au Afakasi e palota ia te au. E tatau lava ona faamanino, ae mo nai isi sui usufono, ia o lea la ua avatu le faamalamalamaga a le sui o Salafai...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Ia o lea la ua ou

malamalama lau Afioga, ae sa ou manatu e le toe tulai mai, o lea o le a finau mai ia Galumalemana. Ia ua lava ia lea Leala.

FOFOGA FETALAI: Ia o lea la o le a finau lava Faleata, aemaise o ou Tapaaau ia...

Afioga Hon Loau Solamalemalo Keneti Sio (Minisita mo Aoga, Taaloga ma Aganuu): Lau Afioga i le Fofoga Fatalai...

FOFOGA FETALAI: Ia Lealailepule, ia leai o lena e manaia lou finagalo, leaga o lou itumalo o le itumalo tu taulaga. O na e i ai ma le au foi lea... iu mai i fafo, ia e le o loloto tele foi le latou foi aganuu. Ae o lena e manaia o lena e te nanu pe a toe Faa-Samoa e ui lava ina sese le Faa-Samoa i le isi taimi, ia ae faafetai i le Minisita o Leipa ma Pisini ma Fefatauaiga ua fesili atu, e malamalama atili ai lea mea.

Se i tulai mai lau Afioga i le sui usufono... malie se i tulai mai muamua le Minisita o Aoga.

Afioga Hon Loau Solamalemalo Keneti Sio: Faafetai i lau Afioga i le Fofoga Fatalai, ona o lea sa taua e le sui usufono sa faauilavea, ia le tulaga foi lea o le faitau tusi ia ma le tusitusi. Ma ona taua ai ua sitia i le 91.9%, a o fuafuaga... o le lipoti a le Matagaluega lenei lea e maua mai ai faamaumauga a le sui usufono. E foliga mai la, ia ou te le tau vivii atu le agai i luma... ae o e ua faapena ona latou pasia le tulaga lea ua matutua, ia ou te faamalulu atu la i le sui usufono.

O fuafuaga uma ia e fai e le Matagaluega o Aoga, mo e o lo o faapena ona aoaoina. Ae ou te faamalulu atu i le aumatutua, pe a faapea e le o malamalama lava i le Tala o le Tupe ma le faitauina o le Tala o le Tupe, ia e leai la se isi aoga e tou te agai i ai. E tou te... e valaau lava le Alii e o le malamalama ai lava ona ua tuai.

Ioe, ae a na vave foi ona outou fai mai, ae o lea ua uma le Paeaiga semeamanu e toe fetuunai lava muniao ma fai se isi aoga mo e le malamalama ua matutua. Ia ma le agaga faaaloalo.

Afioga Faaulusau Rosa Duffy Stowers (Gagaifomauga Nu.3): Lau Afioga i le Fofoga Fatalai...

FOFOGA FETALAI: Ia, malo faafetai, ua manino foi auofala i lea mea. Se i tulai mai lava ia le sui usufono o Anoamaa i Sasae, ia ona sosoo ifo ai lea ma le sui usufono Gagaifomauga Nu.3 faamolemole.

Afioga Alaiasa Muagututi'a Moefaaouou Malagaitutogiai Sepulona Moananu (Anoamaa Sasae): Leai faafetai lau Afioga o lea ua saunoa le

Minisita i le tulaga lea, leaga e pei e lilifa agai i le Matagaluega o Aoga le faamalamalamaina o le siitia o le Literacy Rate lea sa taua e le sui usufono. Ia e ma te o atu, o i lalo o le 50%, ia ae o lea la ua i luga o le 91%.

Ae o le naunautaiga, ia oo i le tausaga lea, ua 100% ia malamalama uma ia ae ua maua foi lenei avanoa e manaia tele le faapupulaina o le faamalamalamaga o le o fuainumera ia sa talanoa mai ai le Taitaifono o le Komiti o Tupe. O se vaauga lea i tua i le 40 tausaga, aua ou te manatua le tausaga 1980, o taimi ia sa mafatia ai lo tatou atunu, leaga o lea e molimau atu sa i ai i lea vaitaimi, ia o lea la ua o tatou vaavaai i fuainumera, e na o le \$2 miliona aitalafu.

Ia aua tasi lenei mea o lo o pisa ai le atunu fai mai ua tetele aitalafu, tetele aitalafu. \$2 miliona sa i ai, ae fai ia le atinae e na o le \$7 miliona. O le taimi la nei, o lea ua o tatou nonoina ia le tai \$100 miliona, ia ae fai ia tatou atinae i le tai \$300 miliona. O le vave ona siitia i luga o le faamoemoe o le tatou atunu.

E pei lava o lou aiga, a e fia fealuai i le taavale e te alu e nono mai le tupe e atiae ai lou aiga. Ia ae o la e maua lou malosiaga i le umi o lou soifua e togitogi ai. E faapena foi le mea le a e fai e le Malo. O le pau lea o le mea e manatua ai si ou tama sa Taitaifono i le Komiti o Tupe i le vaitau lea na ou... o lana ia lava lea... le tama lea ia Tuiloma. O lana ia lava lea ratio e talanoa ai, Debt Service Ratio. O lana ia lava mea... i le vaavaai lava ia a le Malo, o lea e lelei le malosiaga ia tatou, e tatou te faapena ona totogi ai a tatou aitalafu aua le atinae. Ia ma le agaga faaaloalo, e pei ua maua sia avanoa, ia ma le... ia manuia le tatou Fono.

FOFOGA FETALAI: Malo, faafetai i le saunoaga malamalama. Ia se i tulai mai ia le sui usufono o Gagaifomauga Nu.3, lau Afioga Faaulusau.

Afioga Faaulusau Rosa Stowers: Faafetai i lau Afioga i le Fofoga Fetalai mo lou avanoa. Ia ae se i toe seu mai lava i fanua le mataupu na ala ai ona... o le literacy rate lea na saunoa i ai le Afioga ia Lealailepule. Ae ou te talitonu o le vaega lea e le o nofoia o latou nofoa lea e faapea ai i le literacy rate lea po o le faatulagaina foi o le malamalama ma vaega faapena. O lou au lava talitonuga o lou sui usufono, e le o le literacy rate lea e faaletonu ai le vaega lea. Ae o le usitai rate lea e faaletonu ai le vaega lea. E 99% lea le le usitai ai i Tulafono Tumau o le Maota, ia ma faapena foi ma le le fia malamalama i Tulafono ua uma ona pasia e le Maota lenei.

Ae e fai lau tala, ona o le tulaga foi lea ua i ai ia faamoemoega o i latou nei, lea ua fai ai le faatosina ma tulaga faapea, ia ma ua le usitaia ai ma Tulafono ua uma ona pasia e le Maota, ma lou faaaloalo faafetai.

FOFOGA FETALAI: Ia se i tulai mai le Palemia.

Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetralai, i le literacy rate, i le malamalama, ae autu i le iloa faitau tusi. E tatau ona malamalama lelei le mea lea. O le mea lea sa taua tele ai ia mea nei o Aoga Faitau Pi Tautau a Faifeau. O lea ou te talanoa atu leaga o i ina na amata mai ai lou iloa faitau tusi.

O le matou Faifeau e suafa ia Taulealo. O matou na amata mai lava ona o i i faatoa 2 tausaga. Ia na ao mai lea o le faitau tusi, amata ai lea ona sosoo atu amata muamua i le Pi Tautau foi lea o le A, E, I, O, U, F, G faasolosolo atu ai i le faaiuga H, K, R. Ae e i ai le mea e matautia na faaaoga, o le faaaoga o le vaeli, po o le mataitisi, ae tuu ai i tafatafa le ata. A ato, E elefane, e faigofie ai ona atinae le mafaufau o le tamaitiiti i le vaai i le ata.

O le Science lea na amata aoao i le silia ma le 3 i le 4,000 tausaga talu ai amata mai Eleni. Afai e aoao amata aoao le tagata i le literacy, po o le amata faitau o i ina le faamalama e amata ai ona e aoao i le poto, faitau ia iloa faitau. O le tomai lena faatulaga mai i le taimi o Malo ia o Eleni, na omai ai tagata popoto. E vave ona aoao e le tamaitiiti le faitau tusi i le tau o le mataitisi tuu i ai ma le ata. A ato, E elefane, o le mea lena e vave ai ona faitau tusi.

Ae na maua mai i le ata, lau Afioga o le taua ia o le itu lea. E i ai le mea na tupu, o le aso tele lava, o le alii sili o le nuu lea. E tusa e 2,000 tausaga e le i fanau mai le Mesia i i Eleni, ona fai ai lea o lona aso fanau. O i la, e omai ai tagata e poto i le mea lea o le fau o solo po o poems. O lea la ua alu ia le fuafuaga a le alii sili lea o le nuu, ona ia aamia ai loa lea o le tagata fausolo lea. Ia e faufina se solo e pese. A oo loa ina tumutumu mai ia alii ma tamaitai sili o le Malo, o le a amata, ae e le i amata le faaafe, o le a e sau e te nofo i i, o le a e sau muamua e fai le solo. O le solo e faatatau i le aso lea.

O lea la ua oo i le taimi e fai ai le sauniga tele lea, i le 2,000 tausaga pe a, ae e le i fanau mai le Mesia, ona amata loa lea o le polokalame, ia sau loa le tagata lea fausolo pese loa i lana solo. A o le i pese, na faapea ai le tala a le faisolo, o le a dedicate. O lona uiga, o le a ou faia le solo lenei, e aualofa ai i le alii sili o lo tatou nuu, ma ou atua e toa-2, tau mai lea o le igoa o atua e toa-2. Ia alu loa ma lana solo, ae ua uma foi la na faatulaga lana solo, oi lona totogi.

Ia uma loa, ae o tagata la nei e nofoi i luga o nofoa, o lea e faatulaga o latou igoa. O le tagata la lenei ua matua aoao i le poto lea i le manatua o mea, memory. O lea la alu atu tilotilo, tilotilo, tilotilo sau loa fai lana solo, uma loa le solo savali atu loa i le alii sili, lou totogi. Ae fai mai le alii sili, a malie uso, na ou fai atu ia te oe, e fau se solo na o au. A o lea ua le na o au, ae o lea ua 3 i ou atua e toa-2. O le mea la lea, o le totogi o oe, o le a vae 3. O le a ou avatua na o si au vaega, ae alu e sue ia ou atua e aveane ai le isi vaega lea e 2. Ia ita loa ma le toeaina lea ae sau loa ma le feau, e i ai nai taulelea ia e toa-2 e fia vaai i lau afioga. E vave lava, tamoe loa le alii alu atu lava i fafo

fea o i ai? O la e tu mai i i le 100 iata, e tu mai la i lalo aua o le po, o la e vaai atu lava o la e tutu mai i lalo o laau e fai si mamaao.

E oo atu i ai ua leai, ae agi loa ma le mafuie, pau loa le faletele lea, ona omai loa lea o tagata, e aveese ae tau aumai i fafo ia tagata, e aumai i fafo ua matua leiloa, leiloa se isi. Aua foi ua pala tino, ae o le tagata lea na iloa ai. O le nofoa lea sa nofo ai, o le nofoa lea sa nofo ai, o le nofoa lea sa n ofo ai. Ae e mafua mai i le tomai lea, o le memory learning.

O lea e faavae ai le Pi Tautau lea, o i ina faatoa ou iloa ai, e le o ni tagata faaletonu ia na omai o Misionare. Na o latou fauina ai ia le Pi Tautau e amata ai se i faailoa ia le aoaoina o le Science. O le tamalii ua leva, ua afe ma afe tausaga. Lau Afioga i le Fofoga Fetalai, e taua tele le mea lea ua ou manatua ai le aso na sau ai le toeaina lea mai i Niu Sila o Lange, ona matou o lea i Savaii fai ai lona matai. Po o le Tagaloa ea lea sa faa-Tagaloa ai. E i ai lona suafa matai na fai. E leai na o matou o i Savaii e matou te asiiasi matou afe ai loa i le isi nuu, fai ai loa le usu a le nuu.

O le manaia ia o le sivaloa ma le faatau paia o lea ua finau. Alu alu lava toe toa-2 ia tulafale ia e finau. Ia alu alu lava oo mai loa i le mea lea fai mai loa le isi tulafale, sega, o au e lelei lau aoga, leaga sa ou aoga i le Pi Tautau a le matou Faifeau o le A, E, I, O, U. Ae fai mai foi le failauga lea, e mitai mai e a le tou Pi Tautau, sa ou aoga foi au i le matou Pi Tautau O f, fe, fi, lualua. Manuia le tatou Fono.

Afioga Hon Afamasaga Lepuiai Rico Tupai: Lau Afioga i le Fofoga Fetalai, manu lava e le i toe see atu le Afioga i le Taitaifono, e i ai lava le mataupu taua lea na laga e le Afioga ia Alaiasa e ta te fia paia, ona o le isi lava lea mau sese e feaveai nei e i latou nei i le taimi nei. O lea na saunoa ai Alaiasa i le tulaga o nonogatupe e te alu e fai mo lou aiga, ia ona e sau loa lea e te galue malosi e atinae lou aiga ma totogi.

O le isi lea mau lea e feaveai nei e le vaega lea, o le a tuu mai ia le tausaga litaea i le 65 i lalo o le 65 tausaga. Ia e matautia la le mea lea o le a tupu i i. Ae e alu la... ia 65 i le 60. A e alu atu la e fai ia lau nonogatupe, o le a matua faafaigata aua o lea ua laitiiti tausaga o le a vave ona faalitaea oe.

O le isi mea, o lou totogi tele lea sa e galue ai i le masina atoa, ia o lea o le a vave. Afai la o le 5 tausaga lea o le a va ai, ia o lona uiga o le tele lena o lau tupe e foi mai i i e tapa lau penisione i le 5 tausaga i luma mai. O le isi itu e pito sili ona taua, ona afai o lea e totogi ia lau inisiua o lou soifua, ia o lona uiga o le a alu i luga lou tupe o au premium. Ia ona faapena lea ona faafaigata ona totogi lau inisiua o lou soifua, aua ua vave ona tuu mai i lalo ia tausaga litaea, i le mea lea o lo o tuu ai e le Malo, o le mea lelei mo i tatou uma.

Ia e pei o lou toe tulai atu lau Afioga, a o le Pi Tautau lea e saunoa ai le Afioga i le Palemia, o le summary o le mea lea po o le atoaga Faa-Peretania,

o lau information, plus your emotion, equals long term memory. Ia faafetai lau Afioga.

FOFOGA FETALAI: Malo.

Afioga Hon Tuitama Talalelei Tuitama (Minisita mo Tina ma Tamaitai, Atinae o Nuu ma Afioaga ma Agafesootai): Lau Afioga i le Fofoga Fetalai...

FOFOGA FETALAI: Ia, se i tulai mai lava le Afioga i le Minisita o Tina ma Tamaitai.

Afioga Hon Tuitama Talalelei Tuitama: E na o si mea foi e fia faasao leaga o lea foi e agai i ai o tina lava e faia le galuega lea o le faafaitau o le Pi Tautau. O lea foi la ua taua le aufaigaluega a le Atua e taulamua i le aoaoina o le Pi Tautau mai i le laiti o tatou fanau, e i ai le faletua o le faifeau o le matou aiga sa galulue i Amerika Samoa.

Ia ua omai la fai lana tala i le tulaga foi la i le mea lea o le literacy rate o lea sa molimauna e laua i lea vaega o le atunu i le motu i Sasae sa faigaluega ai. I le mea la lea o le Pi Tautau ua omai nei la tamaiti ua a foi lea ua amata ona faitau le Pi. Ia o tamaiti la, ia e i ai foi la tamaiti e le i vaai lava i lea mea e tau o le elefane. Ia amata loa ona faitau le Pi faasino i le ato, faapea le tamaiti, A ato, ia faasino i le elefane, faapea tamaiti, e, e e leiloa po o le a le igoa, e, e puaa. Ia aua e pei o le foliga o le puaa ia le foliga o le elefane.

O le mea la lea o lana ia fautuaga, i latou ia na faia le Pi Tautau, ia ua tatau ona toe sui pe tuu i ai se esi, se mea Samoa, e iloa ai e tatou fanau. Ia aua o le mea la lea e tupu, faasino atu i le elefane ae e, e puaa. Ia malo.

FOFOGA FETALAI: Ia, ua ou manatu e fai la se Pi Tautau Samoa...

Afioga Salausa John Ah Ching (Faleata Sasae): Pe maua se avanoa lau Afioga...

FOFOGA FETALAI: Ia Salausa lau Afioga o e fia saunoa po o e...

Afioga Salausa John Ah Ching: Ia ou te fia saunoa faamolemole.

FOFOGA FETALAI: Se i aumai la lau saunoaga pe afai o lena.

Afioga Salausa John Ah Ching: Leai faafetai tele mo le avanoa, leai ua ou tulai atu ona ua talanoaina foi le literacy rate ina ia malamalama atili foi le mea lea, leaga ua le gata i le literacy lea sa tau i aso ia, o le iloa faitau, iloa

tusitusi, ae o vaitaimi nei, ua vaevaeina foi le literacy rate. O le literacy agai i le computer, computer literacy, e oo foi la mo le mea o le accounting literacy ina ia e iloa faitau le paketi, iloa fai accounts.

FOFOGA FETALAI: Se i vaai le ao o si ulupoo lena e tala atu i o, i afaina mai... saunoa pea i luma o lau kesi, ae aua e te... o le a afaina le ao o si ulupoo na e tala atu.

Afioga Salausa John Ah Ching: Ia o lea la ua taua e le Afioga i le Minisita o Aoga, ua fai si tuai o le vaega lea e matutua e i ai tatou nei. O lona uiga, o i tatou ia e matutua i le taimi lenei, afa e le i avea sau book keeping i aso ia o e aoga, pe na fai foi le book keeping ae e le lelei lau book keeping, e le mafai foi la ona e malamalama atili i mea ia o le literacy o le accounting literacy i le taimi lenei.

A o mea ia o le agai i luma o le soifuaga ma le olaga, e tatau lava ona aoao uma lava i mea ia. Ia alu lava ia le fesuaiga o le soifuaga ma ao atu lava. Ia o tatou i aso ia, e le i i ai ni computer. Ae o le taimi lenei, o lea lava ua o tatou iloa fai le computer, ona ua o tatou mulimuli ai lava e tatau lava ona ao mea fou. E sau lava mea fou ma ao, ina ia tatou talafeagai lava ia le tatou taimi, ia ma mea o lo o faaaogaina.

O le ala lena, ia o tatou vaevaeina foi la mea ia o le literacy, ia aua ne i faapea e na o le faitau, o mea foi lena e taua i sui e omai i le Palemene, e literate e le gata i le tusitusi ma le tautala, ae ina ia literate foi i mea ia o le computer, mea ia o le accounting, ia o mea o le law ma mea uma faapena, e faaopoopo i le tofamamao ma le utaga loloto, ia ona atoa loa lea o mea e fai ai le finagalo. Faafetai mo le avanoa.

FOFOGA FETALAI: Ia, malo. Ia se i toe tulai mai ia le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetralai e le uma ia le agaga fiafia. Ma e ou te faamalo lava i le sui usufono na saunoa nei ona o mataupu ia e na te laga, e pei ua faatupu manatu ai foi i le Kapaneta ma le Sui Minisita e toe faalautele teisi vaega ia ina ia manino foi, ona e faigata o le Malo lea e alu atu ai ia Faiga Faavae.

E faamalulu atu ai o le Taitaifono, ia ma latou ia e le o saofafai i totonu o le Kapaneta, ia o le ala lena a tutulai atu foi ia le Kapaneta, e fesoasoani atili aemaise e i ai le mea lea ua ou mautinoa i le Fono lenei. Ua atili ai ona malamalama ia le atunuu i nisi o tatou galuega o lo o fai, ia ai ona e faapea ua 5 tausaga o lea ua i ai le Nofoaiga, ua tele le malamalama. O le ala foi lena o lea e ui lava ona e faapea mai foi sia vaega a omai ua toe tipi i lalo i le 3, ae o le umi lea o le Nofoaiga, o le lava taoso foi lea o afioga i sui

usufono, i le tulaga o le faagaioiga o le Malo, ia aemaise ia le faamoemoe ua aumai e lo tatou atunuu.

A tutu atu la matou, tutulai atu, e le faapea ua avea ai se taimi o le Taitaifono. E pei o manua e aoga manua ia faaopoopo. Ae e i ai le vaega taua ua toe faatupu manatu ai, o le vaega lava lea e toe faalautele ai e le Minisita o Tupu, o le itu lava lea o mea nei o nonogatupe. E leai se nonogatupe e faia, pe afai e fua atu i le fua, ua uma ona taoto e le Malo, o le mea lea e tatau ona gapa ai ia nonogatupe. E fua i le gafatia po o le Debt Service Ratio. E fua i le gafatia e le Malo ona tauave ia nonogatupe nei. O le ala lena e taua ai le itu lea o le Debt Service Ratio. O le malosi lena o le totogi aitalafu, aua o le a le aoga e tele ai au aseta, ae nono atu oe e ave e loka i le falepuipui i inei? O le faataitaiga ona o le leai o ni au tupe e totogi ai au aitalafu.

Lau Afioga i le Fofoga Fetalai, e oo lava i Malo ia ua oo i le masina, e ala ona malosi ia le tamaoaiga, ma maua galuega a latou fanau, ona o lea e faaaoga le taleni na aumai i le Atua e faagaioi ai mea o lo o mafai ona maua i o tatou lima. O le tele lava o nei gasu e feagai ma tatou, a e faitau totoa, faitau totoa i Gospels o le Talalelei, e te maua mai a i ina ia fofo o nei faafitauli e feagai ma tatou.

E mafai ona ou faatepa i ai, i le faataoto i le vaega foi lea e toa-3 na tuu i ai ia mo tupe tau tupe e faigofie. Ia o le a ou alu ae o le a tuu atu tupe ia oe ma oe ma oe, e e faafaigaluega. E foi mai, na alu le isi tanu e le faaaoga. Ae o le a le mea na fai e le isi? Na faaaoga lelei, na faaaoga i le a? Faaaoga faagaioi, o lona uiga na nono atu foi i isi, faagaioi e latou totogi mai e sau le pule, ua faulai le seleni na avatu i ai.

O le ala lena e eseese ai ia le tamaoaiga, lea e fai mai ai le Tusi Paia, eseese tatou taleni na aumai ia tatou. Ona a lea? Ona alu loa lea o le isi faaaoga tatau le taleni, ae faafefea le isi? Alu nofonofo, alu nofonofo ma faatalitali, faatalitali i le a? Faatalitali i le tufa. O lea la e sau ai loa ua mauoloa le isi, ae faaletonu le isi. O le la e mauoloa, o la e faaaoga tatau le taleni na ave i ai e le Atua.

E mafai la ona faapea o le a le mea ua fai mea faapito le Atua i le alii lea ua maua ana tupe ae faapea le alii lea? Ia o le tali lena, ua paie le isi, ae e galue le isi. O le a la le mea e maua? Ia e le tutusa ia le atinae o le tamaoaiga, o lea la e faaaoga e Samoa le taleni lena, le taleni lena o le vaavaai, o le vaavaai i Faletupe o le Lalolagi, e maua ma Malo e alolofa mai, e maua mai ai ia le seleni e atiae ai, e le mafai ona faalagolago tatou i ai tatou lava. O le ala lena e ala ai ona eseese taleni, a o e foi e mauoloa, o lea e faaaoga le taleni na ave i ai e le Atua, e masani lava ona tatou faalogo i le isi foi faataoto a le Alii, e toa laitiiti lava latou e o i le lagi, aisea? Tupu ai lea o le fesili, ae o le a la le mea na ave i ai lenei mauoloa? Lenei mauoloa ua o latou maua. O le tali, o la e faaaoga tatau le taleni na aumai e le Atua ona tatou manatua lea, a faaaogasese la le meaalofa a le Atua na aumai ia oe, i lou nofonofo ae

le faasoa atu i isi, o i ina la e te oo ai i le mea lea e fetalai ai lo tatou Alii. A o le tagata ua faamanuiaina, o le finagalo o le Atua, faaaoga le oloa ua e maua e faafaigaluega ai le toatele o tagata e ola ai o latou aiga. O le ala la lena e atili faamanuia ai e le Atua i latou o lo o faaaoga lelei le latou taleni, ona o lea e tele galuega a isi o lea e maua mai ai.

O le ala foi la lena, o lē lava e fetuu nai Saina ia e o mai fafo, a o lea e fai tonu lava le galuega o lea e aumai i i Faataoto, o la e galulue ina ia maua galuega a le toatele o le tatou atunuu. Ae le gata i lena, o le maua avanoa ai o tatou uma e o i ai ma fai ai faatau. Aisea? Aua e maua uma ai lava mea tatou te manao i ai, ae maua foi i se tau e tau talafeagai ma le tamaoaiga. E tumutumu lava fale o Saina latou, ona o le tulaga lena.

O le itu taua lau Afioga i le vaega lea o le 60 tausaga, o i tonu lava na ma talanoa ai i le tausaga e 2002 po o le 2001 ma le Faamasino Sili le Afioga ia Tiavaasue po o le Afioga foi ia Patu. Na talanoa mai ai ia te au, e a pe a ou talanoa i lau Kapaneta ae teuteu le Faavae, ina ia mafai ai ona toe faaopoopo tausaga galue o le Faamasino sa muta i le 1962. Sa fai i aso na i le 1960 na faataoto ai le Faavae, aua o le toatele o tatou e feoti i le 50, feoti i le 60 tausaga. O le tatou Palemia muamua na tuumalo i le tausaga pe faatoa 54 ona tausaga ea i lau tau matau. O le toatele la o tatou tama i le taimi lena, e le i umi le soifua. O le tele lava e maliu e le i oo i le 60. A o le a la le taimi lenei? O ananafi na ou 77 ai, a o le faamatatalaga a le Faamasino Sili ia te au, ua uumi le soifua o Faamasino e moomia ai le faaaauau pea o le latou galuega. E le faapea foi e toatele e Faamasino.

Lau Afioga i le Fofoga Fatalai, o lea na ou aumaia i totonu o le Palemene lenei le Teuteuga o le Faavae, o lea la ua toe tuu ai i tua mai le 62 i le 68. O lea foi la e mafai ona toe maua le faaopoopo e mafai ai ona galue pea i le 69, a o lea la ua tou tilotilo mai ia te au, o lea ou te 77, o lea ua amata lou 78. A o le a le tulaga o le Peresetene o Amerika? E 78 tausaga. A o le a le tulaga o le tele o Peresetene i o i nuu ia? Ia, e 93 ea tausaga o le Palemia o Malaysia. O lona uiga, a fua la au i ina i le au Asia, o le matua talavou lava o si tama. Na pau lava le mea lea e tau faaletonu, o lou leo, i le tou fesili soo mai ma ou tau tu soo atu ai e tau faamatala nisi o mataupu. Ae o le tulaga lena lau Afioga, ua faasolo ina uumi soifuaga o le tagata, ma e agai i luma le taimi. A o lou toe tulai mai toe faa-ki agai i tua le uati, o la ua tatou i lumā, o la e ua tatou i lumā. A o le o mai o nisi fai mai e toe tuu i tua, o lona uiga, e tasi lava le agaga, o le faapaie o tagata, aua e ala ona galulue pea, ua leai se mea e tua i ai. Ae a e fai atu nei e malolo i le 60 pe malolo i le 55 pei o le mea sa sau ai le aufaigaluega a le Malo e 55 loa tausaga ona e litaea lea. A o lea ua ese le olaga lea ua tatou i ai, ua maualuga le soifua ua lelei taumafa, ua lelei lo tatou tamaoaiga, ua le toe i ai se oge. Ae ala la ona puupuu le soifua o le tagata ia, o le toaga e tausami ava malolosi. A e manao lava la oe e fia umi lou soifua, aloalo ese ma le taumafa tapaa ma le taumafa o le ava malosi. O se lapataiga taua tele lena mo tatou.

Lau Afioga i le Fofoga Fetalai, o le tulaga lena. O le lava e talaia le talaiga lea e toe tuu i lalo le tatou penisione, ua na faatupuina le agaga o le paie, le agaga o le olaolanoa, le agaga o le ola faalagolago e matua afaina uma ai le tamaoaiga. Ma o se aoaoga e alu atu i se tagata o fia taitai i le Malo, na o le matua oti faasoloatoa ai o le agai i luma o le Malo na muaimalae, le Malo o lea e taumafai isi Malo e faataitai mai i ai ona o le toofilemu. O le ala foi la lena na ou talanoa ai, o faiga ia e fai nei faavevesi, o uiga faa-treason, o uiga foumalo, e tatau ai ona ou tilotilo i ai i le itu lea ia taofia ai uiga nei e ono toe tau ai le Malo i aso o lumana, aemaise o le ave o ni faamatalaga e faavevesi ai mafaufau o tatou fanau o lea e i fafo na o i fafo mo le atinae o latou aiga. O le mea lea, outou o lo o i fafo, taatia mai pea le mataupu i inei, o lo o i ai tou tama e malamalama lelei i tu ma aganuu a Samoa, toa pea le tai ia te outou. O le mea na outou o atu ai i fafo e faaaoga a outou fanau, o le mea lena e aoga mo outou, nai lo le faalogo atu o tou tauaimisa i faamatalaga taufaavalea lea e alu atu ai i inei, ona toe tipoti mai ai lea o nisi o outou e le i faia tou sitiseni.

O lau fautuaga ia outou uma, totogi le tupe e fai ai tou sitiseni, e le iloa ala o vae. Na o fautuaga lelei fautuaga lelei e alu atu i le Vaega lenei lau Afioga i le Fofoga Fetalai, ae le o le limataitaiseseina o outou i upu taufaavalea, faavevesi Malo, o lea e alu atu i inei talu ai nei mea o le fia pai Malo, fia pai Malo. Lau Afioga i le Fofoga Fetalai, o le taua lena. E oo foi ia te outou o lo o faapea mai, lagolago le HRPP ia toa le tai. E le o faalagolago atu foi le Malo lenei i ni mitiafu tou te faasalalauina ma avea ma mea tou te misa ai. E le o faalagolago atu foi le Malo e fesili atu, lafo mai ni tupe matou te alolofa ia te outou, ona o lena e leai ni a outou galuega le toatele. E tasi lava le mea e faalagolago i ai le Vaega lenei, e faalagolago i le Atua i talosaga e sau ai tofiga. E le faalagolago i ni tupe, e le faalagolago i ni tupe. E faalagolago i le Atua o lo o sau ai tofiga.

O le mea lea outou o lo o i fafo soia ia tou te faapena, leaga e sao ai foi ma isi mea faaletonu, leaga o le lalolagi o lo o filogia, e i ai foi ma Satani. E tupulua lava le saito ma le titania.

Ia o lau toe faaopoopo atu lena lau Afioga.

FOFOGA FETALAI: Malo. E i ai le manatu ua manaia le saunoaga. Ia, ua faapena foi ona tatala lava le avanoa se i aumai finagalo o sui usufono mamalu, leaga o le Taitaifono o le Komiti o Tupe a le Palemene lea e saunoa ina ia faapena ona maua mai outou finagalo e matimati ai. Ua tatou faalogoina i lenei foi taeao, ua vaevae mai e le Taitaifono mai lea 10 tausaga i lea 10 tausaga lona eseesegea o tupe sa mafai ona maua mai lea taimi ma lea taimi, ma tupe sa faaagaaga mo le faamuamua.

O le mea la lea e momoli atu ai le agaga faafetai. Ae na ona faamanatu atu lava e le Nofoa, o mea uma lava, o la le Fai Salamo, “e galulue uma mea na fai e le Atua mo le lelei o ona tagata”. Ioe. E faapena i le tagata e faalagolago

ma faamoemoe i le Atua ma gaoioi. Ae le faapea e faamoemoe i le Atua ma faalagolago i le Atua ae le gaoioi. Ia o le a le mea a le Atua e fai mai pe afai e te le alofa lava oe ia oe? E te muai alofa ma fai le galuega lelei mo oe, agalelei le Atua ia oe i so o se mea.

Ia, tulai mai le sui usufono e faaaauau le...

Afioga Afoa Amituanai Taleulu Mauli (Palauli Sisifo): Lau Afioga i le Fofoga Fatalai e fia maua se avanoa e fia fai atu ai sau tala faamolemole.

FOFOGA FETALAI: Ia, se i tulai maia i te i ua faapea foi ua faapito manu ia tasi. Mo le a lou finagalo?

Afioga Afoa Amituanai Taleulu Mauli: Ia faafetai lau Afioga i le Fofoga Fatalai. Ou te fia faapai atu i le saunoaga a le Afioga i le Taitai o le Maota, ona...

FOFOGA FETALAI: Oi, leai la. Ia se i onosai mai. Se i onosai mai faamolemole le sui usufono, e le mafai ona faauilavea se sui usufono i se faauilavea a se isi sui usufono, e le mafai foi ona e fesiligia se faamalamalamaga mai se faauilavea. Ioe, vagana o se mea sa taua e le Taitaifono ona...

Afioga Afoa Amituanai Taleulu Mauli: Ia, e lavea tonu ai lava ma mea faapena lea sa taua e le Taitaifono lau Afioga.

FOFOGA FETALAI: Ia, se i tulai maia e faapuupuu mai, alofa ia e faapuupuu mai Afoa.

Afioga Afoa Amituanai Taleulu Mauli: Faafetai i lau Afioga i le Fofoga Fatalai. O o le mea tonu lava la lena lea sa ou faamanua ai i le Afioga i le Palemia. E 5 tausaga lea o le a sau ma le isi 5 tausaga 10 tausaga, 77 tausaga lea ua i ai ma le 10 tausaga, ua 87 tausaga....

Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fatalai, o lea o le a pei o le Atua le sui usufono. O lea e tuu atu e tatou i le Alii o Ia e ana tofiga, a o lou toe tulai mai, o le a ou toe faamamafa ai le upu lenei mo a tatou fanau ia e i fafo ma o tatou aiga. Soia ia tou te manatu mai, na o le pau lava le mea o le faalogologo mai i felafolafoaiga ma outou malamalamama lelei ai ma outou tatalo. Ae tuu ia na mea o mitiafu, tuu ia na mea o le manatu mai e lafo mai ni tupe, i te i foi ua fai fai ai e se isi. Ae o le tatou galuega o lo o fai nei, e faapena. O le Malo e faavae i le Atua. A ta faavae i le Atua, ave uma i le Atua o tatou moomooga. O le mea lena o

lea e fai mai ai le Tusi a Paulo i le Ekalesia foi lea e i i i le Mount Vaea, “lafo uma i le Atua mea uma o e manao i ai, mea uma lava. O le Ekalesia i Filipi i Mount Vaea. Ave uma lava i ai ou manaoga, ona faitalia lea o le Atua ma faavasega.” E le o se tatou mea lena.

O le mea la lea, tatou aiga uma lava o i fafo o lagolago mai i le Malo, na o le pau lava le mea taua, tatalo, e leai nisi mea. Tatalo.

FOFOGA FETALAI: Malo faafetai. Tulai mai le sui usufono mo...

Afioga Tafua Maluelue Tafua (Aleipata Itupa i Lalo): Lau Afioga i le Fofoga Fetalai, ou te tatalo atu i lau Afioga sina minute lava. O se mea e fia faasao lau Afioga, o lea e saunoa le Palemia o le Tusi a Filipi ia Mount Vaea, e leai se Mount Vaea a Afoa na o le RSA. O le Tusi la a Filipi i le RSA. Ma le faaaloalo.

FOFOGA FETALAI: Malie ia, ua ou faamuta. Se i tuu atu ia le avanoa o lea ua uma le tatou taimi o le galuega.

Ia, tulai mai lau Afioga i le Taitaifono o le Komiti a Tupe a le Palemene.

Afioga ALIIMALEMANU ALOFA TUUAU: Lau Afioga i le Fofoga Fetalai, ou te fia foi lava i tua i le Pi Tautau lea sa atoa le itula o talanoa ai le Maota lenei. O le Pi Tautau lea, lea sa ou aoga ai foi i o i le matou nuu i le matou faifeau, ma o i ina foi sa ou iloa ai fai le faaopoopo ma le toese, o le vaevae ma le faatele, lea la na ou iloa ai faitau Tala o Tupe. Ia, ona oo mai loa lea i i, o lea la na ou iloa ai faitau le tupe faameaalofa lea mai fafo, lea sa ou taua, e \$210,000 lea ua oo mai i le taimi lenei ua \$255.8 miliona.

O i le siitia pea i luga o tupe faameaalofa nei mai a tatou paaga, tatou te iloa ai i i le maoae tele o le siitia pea i luga o tupe nei e aumai mai a tatou paaga, ma e tauala mai i fesoasoani po o tupe ia faameaalofa, e auala mai i le aisi faatamalii lea sa ou faalogo o taua i le isi taimi i le Maota lenei. Le aisi faatamalii lea i taitai o Malo. Ma e fua le faamatuu mai o nei fesoasoani i le talitonuina o le Faigamalo ma ana faiga faavae e taiala ai pulega lelei. Ou te talitonu, o le mafuaaga lea na ala ai ona fai a tatou reforms mai lea vaitau i lea vaitau, lea sa ou matauina sa taua ai le tuueseeseina o le Public Works i le 2001. Lea foi e ala ai ona tapena ma toe iloilo faiga faavae i lea taimi ma lea taimi po o talafeagai, pe toe iloilo foi faiga po o le faatinoga o galuega, policies and processes. Aua o le mautu o tulaga ia i faiga faavae, e taiala ai pulega lelei, manino mea uma ma ia manino le faatinoga ma le faataotoga o le faatinoga o galuega. Ona talitonuina lea ma faatuatuaaina le faamatuu mai o fesoasoani mo le atiaeina o le atunu, lea e taua soo i totonu o le Maota lenei, good governance, transparency and accountability.

O tupe faatatauina foi lea sa ou tolaulau mo atinae, o lea sa ou tolaulauina le tai 10 tausaga, tatou te iloa ai e le i faigofie le amataga mai o le fausiaina

o le lumanai o Samoa seia oo mai i le tulaga ua i ai nei lo tatou atunu. Mai le \$7.7 miliona sa patino i atinae, 10 tausaga e va ai ua \$53.3 miliona, oo mai i le isi 10 tausaga ua \$93.8 miliona, oo mai i le 2011 ua \$224.8 miliona, oo mai i le taimi lenei, ua \$125.3 miliona. Aua tatou iloa lelei lava le mea ua pau ai. Ua atagia ai i ina le faataua a le Malo mo le atinaeina o le atunu aua tupulaga o le lumanai. Ua ogatasi lea ma le autu o le saunoaga a le Minisita o Tupe i le Tala Faatatau Faaopoopo (Nu.1) 2020/2021 lea e faaautu faapea, “Ia tatou lalagaina faatasi se lumanai manuia ma mausali mo Samoa.” E ui lava o lo o agai le autu i le tulaga tau tupe, ae ou te manatu, e aofia ai ma vaega uma o le soifua, ina ia faamautu se lumanai saogalemu, filemu ma manuia mo tupulaga o Samoa o fai mai i so o se tulaga e moomia. E tele mala faalenatura sa afatia ai le folaua o le 40 tausaga e pei ona sa tatou matauina ma molimauna i afa ma lologa, o mafuie, o le tsunami, o le misela, o le Koviti-19. Ma e talitonu sa faigata ona toe tau atiae ina ua tutupu mai nei puapuaga, i le toe fetuunaiga o mea e ave i ai le faamuamua a le Malo, ae ia aua lava ne i nofo auaunaga taua masani, ae toe taumafai mea na faaleagaina. O lo tatou valaauna lea o Taitai o Samoa, o le silasila i ni auala e puipui ai Samoa ma ia tapena ia malosi ma malu Samoa mo a taeao.

Ona oo mai lea o se tala i le Tala Faatatau o le Tupe o le Paeaiga lenei 2017 e oo atu i le 2021. Lau Afioga i le Fofoga Fetalai, o le Tala Faatatau o Tupe o lenei 5 tausaga o le Paeaiga lenei, o saunoaga autu uma lava a le Minisita o Tupe o lo o faapunafanau ai le faamamafa lenei, toe fetuunai tupe maua ma tupe faaalu ina ia fausia ai se faavae mautu mo le tamaoaiga mo le lumanai. O i lea e taoto ai le talitonuga o le itumalo lenei o Alataua Sisifo i tulaga tau tupe i tapenaga ua maea ma tapenaga o lo o faagaso pea, ma tapenaga ua uma ona fuafua ma faatulaga mo le lumanai o Samoa. O le faataua, o le faamuamua lea o auaunaga masani mo aso uma mo le manuia lautele o le atunu ma faaauau pea le atinaeina o le atunu mo a taeao.

O le Paeaiga lenei, sa faatatauina le \$578 miliona o tupe maua i le 2016/2017 lea tatou te aoina mai tiute ma lafoga ma auaunaga eseese. O le 2017/2018, e \$625 miliona. Oo mai i le isi tausaga e sosoo ai ua \$626 miliona. Tausaga lea na se i mavae atu nei e \$646 miliona ae oo mai i le tausaga lenei ua \$593 miliona. O se lui tele sa feagai ma le Afioga i le Minisita ma le aufaigaluega o Tiute ma Tupe Maua mo le faatupeina o Tala Faatatau o Tupe. Ae sa tele foi fesoasoani ma tupe faameaalofa mai a tatou paaga mo le faatupeina o Tala Faatatau o Tupe o tausaga taitasi, aemaise lava mo atinae. Lea sa faatatauina i le 2017 le \$242 miliona. Oo mai i le 2018 e \$200 miliona sa faatatauina lava mo atinae. Oo mai i le 2019 e \$223 miliona. Oo mai i le 2020 e \$179 miliona. Oo mai i le 2020/2021 e \$255 miliona, faatatauina e patino lava i atinae. O nei fesoasoani pei ona ou taua lea e tau o grants, e taua ai tele faiga paaga ma atunu i fafo, e lagolago ai i tatou atinae, lea e taua ai tele galuega a le Matagaluega o le Va i Fafo ma Fefaaatauaiga, faapea foi a tatou Ofisa o Amepasa ma Hai Komesina i atunu

i fafo, ona o i latou ia e fai ma sui vaaia o le tatou atunuu, ia ma fai foi ma sooupū i le faamatuuina mai o fesoasoani.

FOFOGA FETALAI: Malo faafetai. Manaia le saunoaga manino, e ui lava ina augata le Nofoa e faauilavea e piīama i le saunoaga, ae ona o le tatou taimi ua faapena ona tatou toai taunuū i le mutaaga ma siui o le galuega. O le mea la lea ou te faamalie atu i le sui usufono o lo o saunoa le Taitaifono o le Komiti o Tupe, ia, tatou tala soifua i le aso a taeao e faamaea lelei ai le saunoaga.

Ae ona o lea ua tatou toai taunuū i le mutaaga o le tatou galuega, ae tatou te le i tolopo ou te tapa le sui usufono mo Aiga i le Tai, Mulipola e tulai mai e faaiuina le tatou Fonotaga i se tatalo.

Na tolopo Taualumaga a le Fono Aoao Faitulafono i le itula e 12:59 i le aoauli sia aulia le Aso Lulu, 17 Fepuari 2021 i le itula e 9:00 i le taeao.